

KA LAWEI U KHASI



Da

Rev. I. Kharkongngor

First Edition © 1998




KA LAWEI U KHASI

Da

Rev. I. Kharkongngor

First Edition © 1998



SHIKYNTIEN

Haba ngi phai sha la ka jong ka ri bad kylleng ka pyrthei ngi iohi ia ka jingiaksaid ki briew, wat lada ki dei ban ialeh da ka thma, ban pynim ia la ka jong ka ri bad ka jaitbynriew. Ka jingjyllei ka jaitbynriew, ka jingiakhleh jaitbynriew bad ka jinglynshop ki heh paid ia ki rit paid ka wallam ka jingartatien, ka jingsyier bad ka jingduh jingkyrmen ia ka jaitbynriew kaba duk, kaba tlot bad rit paid. Bun ki jaitbynriew ha pyrthei kiba rit paid, kham tam ki jaitbynriew riwulum, ki ngam jyllop noh ha ka duriaw ki jaitbynriew kiba khraw bor bad bun paid. Haba nga phai sha la ka jong ka ri nga sngew ba ngi dei ban ainguh ia U Blei ba u ai kum kane ka ri lum kaba dap da ka dud bad ka ngap. Haba nga phai pat sha ka jaitbynriew ngi i artatien ia ka Lawei jong ka. Ki dak ki shin kiba don hapoh ka ri bad ki dak ki shin kiba ap thap na baroh ki pud sawdong ka ri ki pynpaw ia ka Lawei kaba dum jong ka ri bad ka jaitbynriew. Ha ine i Kitab rit, *'Ka Lawei U Khasi'* nga pyrshang ban wallam katto katne ki dak ki shin kiba kah dum ia ka jaitbynriew Khasi kiba nga iohi bad shem ha ka jingim kaba man la ka sngi, bad nga iehnoh ha u paid nongpule uba ieid ri ban pyrkhath bad ai jingmut lem ban jop ia kine ki jingeh ha kata ka rukom ba ka ri bad ka jaitbynriew kan neh bad ioh im putet.



Ki Jingkhung

1.	Ka Ri Khasi bad Jaintia	1
2.	Ka Jaitbynriew Khasi	4
	(a) Ka jingmut jong ka kyrteng ' <i>Khasi</i> '	4
	(b) Ka tynrai jong u Khasi	6
3.	Ka rukom ai jait u Khasi	9
4.	Ki Kur Khasi	12
5.	Ka ktien Khasi	17
	Ki ktien bad ki kyntien Khasi Nongkyndong ..	19
6.	Ka Khyndew ka Shyiap	27
	Ka jingpyndonkam ia ka khyndew	28
	A. Ka rep ka riang	28
	B. Ka spah na ki mar pohkhyndew	31
	(a) U mawshun	31
	(b) U dewiong	32
	(k) Ka spah na ki khlaw ki btap	35
7.	Ka synshar ka khadar	39
8.	Ka spah bymhok	44
	(a) Ka spah	44
	(b) Kamai ia ka hok	44
	(k) Ka peisa iohei	45
	(d) Ka peisa ia khalai	45
	(e) Ka bam sap ne bam tyngka	46
	(g) Ka dor jong ka jingbamsap	47
	(ng) Ka jingmih na ka jingbam sap	48
9.	Ka trei ka ktah	52
	(a) Ka kam rep	52
	(b) Ka kam khañi	54
	(k) Ka jingtrei shimet shimet	56
	(d) Ka jingkhañi shabar ri	57

1. KA RI KHASI BAD JAINTIA

Ka ri Khasi bad Jaintia ka kynthup ia ki saw tylli ki District jong ka Jylla Meghalaya - West Khasi Hills, East Khasi Hills, Jaintia Hills bad Ri Bhoi District. Ka kynthup ruh ia ki katto katne tylli ki jaka bad ki shnong kiba hap noh mynta ha ka ri Bangla Desh bad katto katne tylli ki jaka bad ki shnong kiba hap mynta ha ka Jylla Assam. Kumba long mynshuwa, ka jingheh bad ka jingiar jong ka na mihngi sha sepngi, na shatei bad shathie ka long kumba 7000 (hynniew hajar) square miles. Mynta ka la rit shibun bad kan nang kham rit shuh shuh, lada jia ba ka ioh la ka jong ka Jylla kaba pura bad kaba kyrpang.

Ha ka por ba ka ri India ka ioh ka jingsynshar laitulid, bad shuwa ba ka Sorkar Phareng kan pyiniakhlad ia ka India bad East Pakistan, ka la buh ia ki stad ban jurip (survey) ia u pud u sam hapteng ka East Pakistan bad ka Assam kaba kynthup ia ka ri Khasi bad Jaintia. La sngewthuh ba ka sorkar ka la jied katto katne ki rangbah Khasi kiba kham kysai ban ia don bynta lang ha kane ka kam ban jurip ia u pud u sam jong ka ri. Ka Sorkar ka la buh kyrpang ia ki rangbah Khasi da kata ka jingsngewthuh ba kin iarap lem ban kdew ia ki jaka puta, ki shnong ki thaw bad u pud u sam jong ka ri Khasi bad Jaintia shuwa ban pyiniakhlad ia ka East Pakistan bad ka Assam ha kata ka por. La sngewthuh ruh ba ha ka por ba pynlong ka jurip ia u pud u sam ym don ki rangbah Khasi ba la jied ban iamih khmat ha katei ka kam. Ka jingmih na kata ka long ba bun ki aka puta, ki shnong ki thaw Khasi naduh Wah Barak na

shaphang shathie lyngba ki khap pud East Pakistan shaduh shatei Khap Garo ki la hap noh hapoh ka East Pakistan. Da ki hajar ki Khasi kiba shong ha Muktapur, Jaintiapur, Myrnensing, Synrem bad kiwei kiwei ki shnong bad jaka Khasi ki shu kylla long khar Bangla tang na ka daw ba ki rangbah Khasi jong ngi ki leh bym suidniew bad bym don ka jingkit khlieh ia la ka jong ka ri bad ka jaitbynriew.

Ha ka por ba ka Sorkar India ka ai ia ka Jylla Meghalaya, ki rangbah jong ngi ki la kmen eh ba ki la ioh ban synshar hi ha la ka jong ka Jylla. Ha ka por ba pyniakhlad ia ka Meghalaya na ka Assam, hato ki rangbah jong ngi ki la da iit bha ia u pud u sam ne ki shu kmen ba la ioh Jylla pura ? Kumba shibynta ka Hima Myliem, shi bynta ka hima Jaintia, shibynta ka hima Jirang, bad shi bynta ka hima Rambrai ki shu duh bad la ioh ei ka Jylla Assam. Bun ki shnong Khasi kiba don ka jingiathuhkhana pateng kiba don nam kum ka Khanapara, lum Kamakhya, Shandubi bad kiwei kiwei ki shu duh lehnohei namar ki rangbah nongsynshar jong ngi kim don ka jingkitkhlieh ia la ka jong ka ri bad ka jaitbynriew.

Ha kine ki sngi mynta bun bah ki shnong ha nongkyndong bad ha ki nongbah ruh kiba la buhai shnong da ki nongwei bad ki bar ri. Hato ki nongsynshar jong ngi ki iohi ia kata ? Man ka por ngi iohi ia ki jingiakhieh, jingialeh bad jingiapyaniap. Bun ki kynhun trai ri kiba pher ba pher bad ki seng bhalang kiba tem ia ka jingiakhieh bad pyrshang ban wallam ia ka jingiasuk. Imat katba nang wallam ia ka jingsuk katta nang jyllei ki nongwei bad ki bar ri. Ngi sheptieng ba ka por kan poi bad kan ym slem ba ka jaitbynriew Khasi kan kylla nongwei ha la ka jong ka ri. Namar ba ka jylla Meghalaya ka long kaba laitlan, ki nongwei bad ki mynder ri ki ioh ban wan rung ha n

Khasi bad Jaintia katba mon. Ki ia shong kha khleh katba mon, ki ioh lad ban ia khaii katba mon bad kham bun ki mar ha sla bad hapoh khyndew kiba heh bad ba rem dor la ioh ban bat bad pyniaid da ki nongwei. Kine ki dak ki shin ki pynpaw ia ka jingshong kynrong ka jaitbynriew bad ka lah ban kyllon ha kano kano ka por.

Ka ri Khasi bad Jaintia ka long ka ri kaba riewspah, lehse kaba riewspah tam na ki ri lum ha ri India. Kumba ong mano re ka ri ka dap da ka dud bad ka ngap. Kat shaba phai ka don ka spah kyrhai ha sla bad hapoh khyndew. Ki briew kylleng ka ri India bad nabar ri ruh ki i brai ban iaioh bynta ia ka spah jong ka ri Khasi bad Jaintia. Kane ka pateng bynriew mynta i kumba ka lamwir namar ka jingkwah spah - kam salia ban bam duh noh baroh ia ka spah kaba don ha sla bad hapoh khyndew kumjuh. Ka ri kaba rit shitroh hynrei la kwah ban bam duh baroh khlem da tyngkai shuh ia ka pateng ka ban wan. Ka long kaba sngew sangsot ia la ka jong ka jaitbynriew ba ka pynbujai ei ia la ka spah. Kumba long mynta, imat tang kumba arphew na ka shispah ba ka jaitbynriew Khasi ka ioh ban pyndonkam hok ia ka spah ha la ka jong ka ri bad phra phew na ka shispah la ioh kit ei da ki nongwei bad ki mynder ri. Bun ki jaka mynta ha ri Khasi kiba seisoh ki la kylla 'dew-shrah, ki um kiba shngiam ki la kylla kthang, bad ki lum kiba pyngngad ki la kylla par-maw bad maw-sohrew.

Haba phai sha ka ri Khasi bad Jaintia, kumba long mynta, i kumba ka don ka jingitynnad, ka jingiphuh iphieng ha ki iing ki sem, ki lynti syngkien bad ka long briew man briew. Ki briew ki kham ibit ibiang bad kham im pahuh pahai haba ianujor bad ki phew snem kiba la leit noh. Haba shu peit tang na sla, ka jaitbynriew Khasi ka la i jymgam kum u jhur kubi. Hynrei borabor

ngi dei ban kynmaw ba ha u jhur kubi uba jymgam ki kruin ki sngewtynnad ban shong bad ki shong ruh ha tyllong ka jaka bym lah iohi da ki khmat, ki kjit bad ki bam suki suki ia u thied bah haduh ban da tyrkhong. Ha ri Khasi bad Jaintia ki kruin ki la jyllei ha ki nongkyndong kham tam ha ka thain Jaintia bad bun ruh ha ki jaka iew ha Nongbah Shillong. Lada ngim khlong noh mardor ia kine ki kruin, ka jaitbynriew ka don ha ka jingma.

2. KA JAITYBYNRIEW KHASI

Ka jingmut jong ka kyrteng 'Khasi'

Ka kyrteng 'Khasi' ka mut ia u **Khyrniam**, u **Pnar** lane u **Synteng**, u **Bhoi**, u **War** bad ia u **Lyngngam** kiba shong hapoh ne shabar ka ri Khasi bad Jaintia hapoh ka Jylla Meghalaya. Ki dei na u juh u thning, kren ia kajuha ka ktien bad na kajuha ka niam ka rukom.

Ka kyrteng 'Khyrniam,' lehse, ka jingmut ka long 'ki khun kiba rem', ka ktien 'Synteng', ka lah ban long 'Ki Khasi kiba la sahteng'. Nga pyrkhat kaba kham sngewdei ka ktien 'Synteng', ka wan na ka ktien tynrai 'Sutnga.' Kaba ki Khasi ki khot "Ki Syiem Synteng", ki long ki "Syiem Sutnga." Ha ka shkor Khasi ka ktien 'Sutnga' ka sngew long khlem akor bad tohmet kumno re, bad kumta ka kylla noh 'Synteng' haba ia pyndonkam ha ka rukom kaba kham don burom. Ka ktien 'Bhoi' ka wan na ka ktien Assamese, 'Bhol', kaba mut 'sheptieng'; ka dei ka kyrteng jong ka jaka ym ka kyrteng

briew ne jaitbynriew. Ka ktien **'War'**, ka wan na ka ktien **'Them'** lane **'Lhuh'**, kum ka ktien **'Pat War'**, ka mut **'Ka jaka them lane lhuh.'** (Ka **'Pat War'** jong ka shnong Pynter, bad kiwei kiwei.

"Khyrniam, u Pnar, u Bhoi, u War, u dei u paid Khasi baiar." Hato ki lyngngam ki dei kiei ? Haba nga kynud sur ia katei ka jingrwai, ka wan shat ha ka jingmut jong nga kumba u Khyrniam, u Pnar, u Bhoi bad u War ki dei ki jaitbynriew baiapher tangba ki pynlong kawei ka jaitbynriew Khasi. Lada don ka jingdawa sngew jaitbynriew kaba kum kata ha la ka jong ka jong ka dong ne ka jaka, nga sheptieng ba ka jaitbynriew Khasi ka lah ban pra bad jah duh syndon na sla khyndew. Kane ka jingpyrshang ban pyniapher paradoh para snam ka wallam ka jingma kaba khraw ia ka ri bad ka jaitbynriew hi baroh kawei.

Ka rukom pyrkhath bad rukom kren Khasi, haba uwei u Khasi u iakynduh ia uwei pat u para Khasi bad haba u kylli, phi dei uei, un ong ba u dei u Nongsor ne u Nong Sohra ne u Nong Mawkyrwat ne u nong Jowai. Kane ka jingong ka mih na kata ka jingsngewthuh ba la kha, la pynsan bad u la shong la sah ha kata ka shnong - bad um ju dawa ba kata ka shnong ka dei ka jong u. Nalor kata, kham niar ba u Khasi un ong ia lade ba u dei u Khasi. Haba u don ha la ka jong ka ri un ong ia lade ba u dei na kata ka shnong bad haba u don shabar ka ri un ong ia lade ba u dei u Nong Meghalaya. Teng teng u Khasi imat kumba u klet noh ia la ka jong ka jinglong briew(identity). Mano ba khot nyngkong ia ngi u **'Khasi'**? Ki khar Shilot na ri thor haba ki khmied ia ka ri lum Khasi kaba sah shrah da ki snem bad ki snem khlem rep khlem riang, ki khot **'Khas'**, bad haba ki iohi ia ki briew kiba hiar na ki lum Khasi sha ri Thor, ki khot **'Khas-I'**; ka mut ki briew kiba wan na ri lum ne ki riwulum.

U Khasi u tei ia ka jaitbynriew ha ki lai tylli ki mawbyrsiew: Ka Kur, ka Ktien bad ka Khyndew. Ka Kur ka dei ka tynrai jong ka longbriew manbriew Khasi. Shi kur lane shipara, haba ki leit shnong sha kano kano ka dong ne jaka jong ka ri, ka jinglong kur ka sah hi. Ka kyrteng ka lah ban kylla, ka ktien ka lah ban kylla bad ka shnong ruh kaba ki shong ka lah ban kylla, hynrei ka jinglong kur te kam ju kylla. Kum ka nuksa, la ong ba ki Mukhim, Shabong, Shallam bad Khonglam ki ialong shikur - kawei ka kpoh. Ki wan na Umtangper (ka shnong kaba la duh noh) ka shnong kaba don ha u pud Khasi Jaintia. Na kane ka shnong ki don kiba leit shong shnong ha Synteng, ha War bad Khyrim. Teng teng haba ki ialum kur shipara hato kin ong ba nga dei u Khyndriam, u Pnar, u Bhoi, u War ne kin ong ba ngi ialong shi-para, shi doh shi snam. Ha ka rukom Khasi, ka kur ka long kaba la pun, la kha, kaba long doh long snam- kam ju don ka kur iapan kylliang, ka kur bynrap ne ka kur kaba shu thaw hi. Haduh kine ki sngi ki 'riew tymmen Khasi haba ki iakynduh para Khasi ki ju kylli, phi ki kur aiu ne ki kur jongno, nangta ki khun jongno. Kim ju kham kylli kyrteng. Ka kur nyingkong bud sa ki khun jongno. Nga sngewphylla lada don napdeng ki khun khasi khara kiba don tang ka kyrteng hynrei khlem kur khlem jait - hato kita ki dei ki khun Khasi ?

Ka tynrai jong u Khasi

Ka tynrai jong u Khasi haduh mynta ka dang sah ha ka jinglyngngoh. Bun ki stad pyrkhath ki la pyrshang ban tih ia ka tynrai u Khasi hynrei kim shym lah ban poi ha kaba kut. I Dr. Hamlet Bareh i shat jingmut ba u Khasi hyndai u wan na ka rudwah jong ka wah Mekong ha ka thain Cambodia. I kdew ba don ka jaitbyriew kaba shim jait na ka kmie kaba khot Khasi ha Laos kaba don ka jingiasoh bad ka kynhun Moi bad Rade

Jarai. I ong ka don ka jingiathuhkhana ba u Khasi u wan sha Assam na sha jngai bah na shaphang mihngi bad khatduh u poi ha kane ka jaka shong kaba mynta. U Gait pat u ong ba u Khasi u dei na ka kynhun Monkhmer halor ka nongrim ba u kren ia kajuh ka ktien- Khasi (Monkhmer family of language). Kiba bun ki riewpyrkhat, imat, ki sngew iahap jingmut bad ka jingkdew u Gait tangba lah ban don kawei pat ka jingshem kaba thymmai.

Kawei pat ka rukom pyrkhat ka long ba ka jaitbynriew Khasi ka long ka jaitbynriew kaba don ha bneng ryngkat bad U Blei. Lyngba ka jingiathuhkhana pateng la pynsngewthuh ba ki khathynriew iing ne trep ki la don lypa ha bneng ryngkat bad U Blei kum u khlieh duh. Ka jingiathuhkhana ka ong ba hadien ba U Blei u la dep pynlong ia ka pyrthei, ka Mei-ramew ka la kyrpad ia U Blei ban thung u nongsynshar u ban synshar halor kiei kiei baroh ha ka pyrthei. La ong ruh ba U Blei u la kohnguh ia ka Mei ramew bad kumta u la khot ia ka dorbar jong ki khathynriew iing ne trep kiba iashong bad U. Ka dorbar ka la iaphylliew jingmut halor ka jingkyrpad ka Mei-ramew bad khadduh ka la rai ba hynniew iing ne trep kin hiar sha pyrthei lyngba kata ka jingkieng kaba don ha u lum Sohpet bneng bad khyndai iing ne trep pat kin sah ha bneng ryngkat bad U Blei. Ka jingiathuhkhana ka iathuh ruh ba ki hynniew trep ki sahkut noh ha khyndew hadien ba la dkut noh kata ka jingkieng sohpet bneng kaba pyniasoh ia ka bneng bad ka khyndew na ka daw ka jingleh pop u khun bynriew. Kane ka jingiathuhkhana pateng i kumba ka da long shisha bad ialam ia u paid Khasi ban ngeit ba ki hynniew iing kiba wan na bneng ki long ka tynrai jong ka jaitbynriew Khasi.

Ka jingpyrta shaphang ka ri bad ka jaitbynriew u hynniew trep ha kine ki sngi mynta ka la pynlyngngoh shibun ia ki khraw jabieng ka juk mynta kiba la ju pyrshang ban wad ia ka tynrai long briew man briew na ki lum ki wan bad na ki jingthaw ba im ba par jong kane ka sla khyndew. Ban pynshong nongrim ia kane ka jingiathuhkhana pateng ka pynkhih jingmut ia ka rukom pyrkhath ki khraw jabieng ban wad ia ka jingshisha ba naduh mynno kita ki hynniew trep ki wan hiar na bneng sha pyrthei, ki wan hiar nyngkong ha kano ka shnong, ki dei ki kur aiu bad ka ktien kaba kumno ki iakren.

Ka don ruh ka jingiathuhkhana pateng kaba kham phylla bad kata ka long ba ka jaitbynriew Khasi ka wan mih na u lum **'Kamakhya.'** Ka ktien tynrai jong ka **'Kamakhya'** ka long **'Ka Meikha'** lane **'Kha na ka kmie'** (mother goddess). Na une u lum la kha ia ka jaitbynriew Khasi bad, namarkata, la khot kyrteng u lum **'Ka Meikha.'** la une u lum **'Ka Meikha'** la niew ba u long u lum uba kyntang namar na une u lum la kha ia ka jaitbynriew Khasi. Ki jingiathuhkhana pateng kiba bun ha la ka jong ka ri ki iathuh ba ia ka jaitbynriew Khasi la kha na ka kmie. La sngewthuh ba ia ka longkur longjait, ia ka niam ka rukom Khasi la bat da ka kmie namar ia ka jaitbyriew Khasi la kha na ka kmie. La ong ba ia ka ri Khasi-Jaintia la tip kum ka **'Mei-rilum'** (ym dei Meghalaya) namar ia ka tynrai long-briew man-briew la mih na ka kmie na ka **'Mei-ramew'** Khasi.

Ka jingiathuhkhana shaphang ka **'Pahsyntiew'** ka long kawei ka nongrim kaba pynpaw ia ka jinglong tynrai jong ka kmie. Na ka **'Pahsyntiew'** la kha ia ki **'Syiem Shyllong'**. Kane ka dei kata ka **'blei longsyiem'** (mother goddess) kaba la pynmih ia ka longsyiem mansyiem kaba dang hiar pateng haduh

mynta. Ka jingiathuhkhana shaphang ka '**li dohkha**' bad ka jinghiar pateng ki syiem '**Sutnga**'; ka jingiathuhkhana shaphang ka rukom hiar patreng ka longkur long jait ha ri Khasi bad Jaintia ka pynpaw shai ba ym don 'Khynriam', 'Pnar', 'Bhoi' lane 'War' hynrei ki long kawei ka jaitbynriew kaba hiar pateng na ki kur Laloo (law Shibdi), Kur Pakyntein (So Kpoh khadar warnai), kur Wahlang Pahsyntiew, Kur Majaw, Kur Slong (San syngkong), Kur Mukhim, Kur Kharsyntiew bad bun syrtap kiwei pat ki kur Khasi kiba don ka jingiadei bad ka jingiating kur para ma ki. Nalor kata, haba pynshong nongrim ia kiba bun ki kur ha ri Khasi bad Jaintia bad haba tih tynrai ia ka rukom hiar pateng ka longkur longjait bad ia ka tynrai na kaba ki mih ka wallam ia kawei pat ka rukom pyrkhat kaba pynartatien ban ong bad ban pdiang ba ka jaitbynriew Khasi ka wan na kiwei pat ki jaka ne ki ri jong ka pyrthei.

3. KA RUKOM AI JAİT U KHASI

Ka rukom ai jait u Khasi ha ka kmie ka long kawei na ki rukom kaba kham phylla haba ianujor bad kiwei pat ki jaitbynriew ha kane ka ri bad kylleng ka pyrthei. Kane ka jingai'jalt sha ka kmie ka don'ka jinglong tynrai naduh basdang ka longbriew manbriew ne ka longkur longjait Khasi. Ha ka rukom Khasi ka '**Kur**' lane ka '**Kmie**' bad ka '**Kha**' lane '**Meikha**' ki long ki ktien kiba la khein kyntang bad khein kor haduh katta katta bad ka long ka bym bit ban kren thala lane pynhiar dor da kano kano ka rukom kren. Ki long ki ktien kiba shong sbai bad shong blei. Da kumwei pat, kine ar tylli ki ktien '**Mei**' bad '**Kha**' ki long tang kawei ka ktien '**Mei-Kha**' lane '**Kha-na-ka-kmie**.' Kine ar tylli ki ktien '**Mei**' bad '**Kha**' ki la longdoh longsnam ha ka jaitbynriew Khasi bad na ki sa roi parum pareh ka longiing

longsem, ka longkur long jait, ka longkha longman bad ka longbriew manbriew ka jait bynriew Khasi. Kane ka rukom ai jait u Khasi sha ka kmie ka dang neh haduh mynta lait noh ki katto katne kiba la pyrshang ban ai jait sha u kpa. Ha kane ka juk mynta la don bun ki khun kynthei Khasi kiba shong kha bad u nongwei bad u mynder ri bad kumta ki ai jait noh sha la u tnga. Don bun ruh ki khun shynrang bad kynthei Khasi kiba ai jait noh sha u kpa, uba long u shynrang Khasi wat haba dang im ka kmie. Kane ka rukom ai jait sha u Kpa, i kumba ki ibein ia ka long kur longjait bad ka longbriew manbriew Khasi kaba la seng la sdang da u longshuwa manshuwa. Nalor kata, ka don ka jingpyrshang hapdeng ki khun Khasi Khara ban pynkylla noh ia ka kyrteng tynrai jong ka jait, ka jingthaw thymmai ia ka jait, ka jingbynrap ia ka jait Khasi bad ki jait nongwei kumta ter ter. Ka jingmih na kane ka long, lashai la shisngi ha ki khun ki ksiew pateng la pateng ka jingiashongkha shongman kan long kaba kynrum kynram. Kan poi ka por ba kin ia shong kha shikur. Ha kata ka por, ka 'Kha' kan kylla 'Kur'; bad ka 'Kur' kan kylla 'Kha'. Ynda la poi haduh kane ka pud, ka shong kha shong man ka la long thala thalein bad ka jaitbynriew kan byrsieh da ka shongsang. Ka lah ban poi ka por ba ki briew kin nym khein shuh ia ka shongsang bad kin ia shongkha katba mon kum ki mrad. Kata ka ktien 'Kur' ka ktien 'Kha' bad ka ktien 'tipbriew Tipblei' kan jah noh na ka jaitbynriew Khasi bad ka ri bad ka jaitbynriew hi baroh kawei kan shu kie-berong ei ha ki nongwei bad ki mynder ri. *Nalor kata, ka jingiashongkha khleh bad ki nongwei bad ki mynder ri, ka pynduh noh ia ka jinglong tynrai ka kur bad ka snam Khasi.*

Kum ka nuksa, buh ka kmie kaba kyrteng ka Don-akor Kharkongngor ka don saw ngut ki khun - ar ngut ki khun shynrang

bad ar ngut ki khun kynthei. Shim ba ki ar ngut ki khun shynrang kin long u A bad u B, bad ar ngut ki khun kynthei kin long ka K bad ka D. Tharai u A Kharkongngor un iapoi kha bad ka L jait Lyngdoh, bad u B Kharkongngor un iapoi kha bad ka M jait Dkhar. Shu buh lada ki khun u A Kharkongngor ki ai jait sha u kpa - ki khun u A kin long Kharkongngor. Ha kajuh ka rukom, baroh ki khun u B Kharkongngor kin ai jait sha u kpa - baroh ki khun u B Kharkongngor kiba long na ka kmie jait Dkhar kin long Kharkongngor. Lada ka long ha kane ka rukom, ha ka jaka ba kin iakhot ne kam para kha, ki la ialong noh para kur. Namarkata, ki khun u A Kharkongngor kiba long na ka jait Lyngdoh ki la kylla Kharkongngor bad ki khun u B Kharkongngor kiba long na ka jait Dkhar ki la kylla Kharkongngor. Kaba mih na kane ha ki khun ki ksiew pateng la pateng jong u A bad B kin nym kynmaw bad niew kor shuh ia la ka jong ka jait ne ka kur. Ki khun ki ksiew u A kin ym kynmaw bad niew kor shuh ia ka jait Lyngdoh bad kumjuh ki khun ki ksiew u B kin ym kynmaw bad niewkor shuh ia ka jait Dkhar. Kan poi ka por ba ki khun ki ksiew u A bad u B kin iashong kha bad la ki jong ki kur bad kin nym iashong kha bad ka kur Kharkongngor.

Shim pat mynta ka K, ka khun kynthei jong ka Don-akor Kharkongngor kan iapoikha bad u S. Syiem bad kumjuh ka D kan iapoi kha bad u P. Mylliem. Tharai ki khun jong ka K kin ai jait sha ka kmie, kumta ki khun jong ka kin long Kharkongngor; bad ki khun jong ka D kin ai jait sha u kpa, baroh ki khun jong ka D kin long jait Mylliem. Hadien habud ki khun ki ksiew pateng la pateng jong ka K bad ka D kin ym iakynmaw ia ka jinglong shipara-arkmie; ki lah ban iashongkha para ma ki namar ki khun jong ka K ki sah jait Kharkongngor bad ki khun jong ka D ki kylla jait Mylliem. Ha kane ka rukom ki khun ki ksiew pateng

la pateng jong ka Don-akor Kharkongngor kiba kha na ki khun shynrang jong ka u A bad u B, bad ki khun kynthai ka K bad D kim lah shuh ban iakhein ne niewtang ia ka jinglong shipara ne jinglong shi-bakha. Kaba mih nangta ka long ka jingkyrum kynram ka shong kha ka shongman bad ka jingiashong sang. Kane ka nuksa haneng ka long ka dak ka shin ba la paw ha ka juk mynta kham tam ha kito kiba khein ia lade ba ki long kiba-la-shai (civilised). Kordit ia ka jaitbynriew lada ngim iohi jngai ia kaei ka ban sa iia.

4. KI KUR KHASI

Ki kpoh kiba mih na ka jait Majaw

1. Majaw 2. Lyngdoh Peinlang 3. Basaiawmoit
4. Basaiawmah 5. Basaiawsnai 6. Basaiawrit 7. Lyngwi 8.
Nongbri Kynrut 9. Hynniewta 10. Longpen 11. Kurbah 12.
Rapsang Marbisu 13. Sangkli 14. Muktieh 16. Khongwar.

Sangkli - ki wan na ki san ngut shipara kawei ka kiaw.

a. Sangkli Pator

b. Sangkli Lalung

k. Sangkli Rngi

d. Sangkli Mawiong

e. Sangkli Pardi.

1. Jungai 2. Pohshna 3. Pohthmi 4. Pohlong 5. Pohsngap

6. Manar 7. Tonay 8. Pohti - La ong ba ki iadei shikur. Jungai ka tynrai ka dei "Susngi". Ki wan na Nongbah.

1. Lamin(Kajat), 2. Lamin (Kasah), 3. Lamin (Pud), 4. Lamin (Nai) 5. Lamin Kashnga), 6. Lamin (Kalang) 7. Lamin(Kadew)- la ong ba ki iadei shi kur.

1. Ngap Kynta 2. Sawian 3. Phanbuh 4. Phankon - La ong ba ki ialong shikur - saw kpoh, kajuh ka 'Mei tymmen.

1. Tangsong 2. Syngkrom 3. Tongpar 4. Tongper - Ki iakam kur. La ong ba ki Tangsong ki wan na Synteng. Ki leit shong shnong ha Mawlat bad nangta ki leit poi sha Nongkhieng.

1. Suting 2. Khonglah 3. Talang 4. Surong 5. Rongsai - La ong ba ki iakam kur. La ong ruh ba ki Khonglah ki wan na Mawlat.

Kshiar (rngibah) 2. Myllierngap 3. Mylliempdah bad 4. Khongshei - La ong ba ki iating kur.

1. Nongrang 2. Lyngdoh Nongbsap 3. Nongbsap Pyrtuh 4. Sohphoh - Kine saw jait, la ong ba ki dei tang kawei ka kpoh.

N.B. Ki Mylliern Pyrtuh bad ki Nongbsap Pyruh kim iadei ki juh. Ki don ka jingiapher hapdeng jong ki.

1. Khongsngi 2. Khongsti 3. Lyngdoh Maphlang 4. Khongnoh 5. Lyngdoh Nongpiur 6. Raptap 7. Thawmuit 8. Pompyrthat 9. Mawlieh 10 Rapsang Nongpiur 11. Khongstia 12. Mawlieh Lyngdoh - La ong ba ki iadei shi kur - Ki khun ka Khmah. Ki don baroh 12 jait.

1. Pathaw ne Khyriemmuat 2. Dohling 3. Kharsohnoh 4. Dympep - La ong ba ki long shi kur.

1. Mukhim 2. Shabong 3. Shalam 4. Khonglam - La ong ba ki iadei shi kur. La ong ba ki wan na Umtangper (Kane ka shnong ka la duh noh. Ka don ha u pud Khasi Jaintia.

Bon - Pasubon, Lipon, Rangad

Tein - Pakyntein, War, Nikhla

Wet - Paswet, Kynjing, Lytan, Lakiang, Katphoh, Lanong, Blein, Kma.

Doh - Lyngdoh, Syngkon, Siangbud, Nangbah.

Ki iong Niangphoh wa ki iong Siangphoh wa ki iong shyrmang Jowai toh ki iong Katphoh.

Ki iong Niangliar wa ki iong Lakhon toh ki iong Lakiang.

Ki iong kon ha Raliang toh ki iong Syngkon na Jowai.

Ki iong Lywait wa ki iong Muthyan toh ki iong Lytan.

Ki iong Pyrdiang toh ki iong Lanong.

Khongmawloh - Ka tynrai ka dei na ka jait Thabah na Sohiong- 1. Khongmawloh 2. Khongngai 3. Khongthngan 4. Khongni-ur. Khong-iang - La ong ba ki ialong shikur.

Thangkhiew - Ka tynrai ka dei na Kseh.

1. Thangkhiew, 2. Pariat, 3. Shyla 4. Blah(Synteng) - La ong ba ki iating kur.

1. Lawriniang, 2. Synrem, 3. Jarain - La ong ba ki iadei shi kur - Mynshuwa la ong ba la khot ia ki 'Synrem' namar ki wan na Synrem.

Ha Riangmang ia ki Nongkynrih la khot 'Nongphod' bad

ia ki Lyngdoh Mawphlang la khot 'Kyllang'.

Lamin bad Nongrum ki iakam kur. La ong ba ki Nongrum ki dei ki Lamin tangba ki kylla Nongrum ynda ki la poi sha Hima Khyrim.

1. Lyngdoh Kynshi, 2. Lyngdoh Nongbri, 3. Nongkynrih, 4. Passah, 5. Shadap - La ong ba ki ialong shikur.

1. Myllem Pyrtuh, 2. Myllem Kamar, 3. Myllem Thangsning 4. Myllem Khun-syiem - La ong ba ki ialong shi kur, kawei ka kpoh. Ki wan na Marbaniang ba shah beh ha ki kur Kharkongngor.

1. Nongsap Pyrtuh, 2. Lyngdoh Nongsap, 3. Nongrang, 4. Sohphoh - La ong ba ki dei na kajuh ka kpoh. Ki kylla kyrteng ynda ki leit shong shnong ha ki jaka bapher bapher jong ka ri Khasi bad Jaintia. Ki dei na Synteng bad ki wan shong shnong ha Nongsap bad ki sa kylla kyrteng artat 'Nongsap Pyrtuh'

Ki Syiem Sutnga:- 1. Syiemlieh Nongkhlaw, 2. Syiemlieh Nongspung, 3. Syiem Nongshai, 4. Syiem Sat, 5. Syiem Umsaw Nongbri, 6. Kurkalang, 7. Muliar, 8. Mynso Shangpung, 9. Nongspung, 10. Nongsteng, 11. Pakem Pajuh, 12. Pyrtuh Shangpung, 13. Sutnga 14. Syiemiong Nongspung.

Kiwei pat ki kur kum, ki Teron, Sen, Rympeit, Bamon, Tado kidei ki Kur Khasi paka - ka kyrteng kur jong ki ka khampher na ki kur Khasi. Don katto katne ki kur ha ri Bhoi kiba don ka jingiasyriem bad ki kur Karbi Anglong. Ngim lah ban tip mano ba shim kyliang -ki Bhoi ne ki Karbi Anglong - donkam ka jingwad kaba bniah.

1. Khongsdoh - La ong ba ki dei ki Diengdoh. Ki wan na shiliang ka Wah Umrew. La ong ruh ba ki iatingkur bad ki Padoh

2. Sohkhlet - La ong ba ki dei ki Sohtun na Sohra.

3. Rumsong - La ong ba ki wan na ki thain Lynshiang.

4. Khongwar - La ong ba ki dei ki Warkon ba hiar pateng na ki Marbaniang.

5. Kharwan - La ong ba ki dei ki Wankhar na Nngkrem.

6. Manar - La ong ba ki wan na Sohkha bad Pamtdong mar shiliang ka Umlarem.

7. Syngkrem - La ong ba ki wan na Mylliem, na ka jait Synrem.

8. Pohlong - La ong ba ki mih na lum Shyllong. Ki leit sha Puriang bad ki pol kylleng kylleng. Ki iakam kur bad ki Pohti, Pohshna bad ki Pohthmi.

9. Kharkongngor - La ong ba ki wan na ri Thor.

1. Lapang, 2. Nongshli, 3. Lakhmi, 4. Mawnai, 5. Mawphniang, bad 5. Nongliang - La ong ba ki iadei kur - kawei ka kpoh.

Ha Nongrim Jirang ia ki Kur Namalieh, Pyrtuh Namalieh, Sohphra bad Namlieh - La khot kylum "Rani."

Ha Nongrim Jirang, Ki Syiem Dyngkhong, Syiemlieh, bad Syiemshai - la ong ba ki iakam kur - la khot kylum "Wahlang" ne "Wahlang Pahsyntiew".

Nalor kitei, don da ki hajar tylli kiwei pat ki kur Khasi kiba don ka jingiadei kur, iakam kur, iating kur kawei ia kawei

pat. Kine ki kur Khasi ki mih na ki shnong kiba pher bapher jong ka ri Khasi bad Jaintia bad na shabar ruh. Don ki kur kiba long kur na kaba pun, ba kha bad ba la pynsan pynrangbah, don ki kur kiba kylla long kur na ka kyrteng ki shnong kaba ki shong, don ki kur kiba kylla long kur na ka kyrteng briew haba ki leit shong shnong sha kiwei pat ki shnong, don ki kur kiba kylla long kur namar kano knao ka jingjia, don ki kur kiba shu long kur Khasi namar ki khun ki shim jait na u kpa nongwei ne kpa mynder ri bad don ruh ki kur kiba shu thaw hi (kham tam ha ka juk mynta).

Haba thain ba woh bha ia kawei pa kawei ka kur khasi, ia ka jinglong kur, ka jingiadei kur bad ka jingiating kur ka pynshisha ba ka jaitbynriew Khasi ka long tang kawei, kumba ong u khar Shilot - 'i-Khas' lane 'Khasi'.

Khngang ban pynneh ia ka jinglong tynrai ka kur Khasi, ka sorkar ka la dei ban buh da ka list ia ki Kur Khasi baroh bad ban ai certificate tang kat kum ka list ba la mynjur da ka Sorkar.

5. KA KTEN KHASI

Haduh mynta ki stad pyrkhath ki dang pyrshang ban wad ia ka tynrai jong ka ktien Khasi. Katto katne ki stad pyrkhath hadien ba ki la lum lang ia ka jingmut jong ki linguist, ki pynkut ba ka ktien Khasi ka long kawei ka tnad jong ka ktien Mon-

Khmer na ki thain mihngi. I Dr. H. Bareh ha ka kot jong i 'The History and Culture of the Khasi People' Cal.1967 p.22 i pynskhem ia ka jingiadei hapdeng ka ktien Khasi bad Mon-Khmer namar ki ktien bad ki kyntien ki long tang shi kynnoh. Ka jingdon ar ne lai kynnoh ruh ka long da kaba pyniasoh nadien bad nakhmat kum da ki ktien 'pyn', 'Byr', 'Jyn' bad kumta ter ter. I Bah Ivan Simon ha ka jingkren jong i, 'Nangno ka ktien Khasi ka wan' ha ka All India Radio ha ka 11,2,76 i kyrshan ia kane da kaba pyni nuksa katto katne ki ktien tynrai(root words) kum:

1. Ia u Maw, ki Palaung ki khot Mau; ki Mon, Kmau.
2. Ia u Khla, ka ktien Khmer, Khla; ki Mon ki khot, Kla.
3. Ia u khun, ki Mon ki khot Kon, bad kumta ter ter.

I Bah L. Gilbert Shullai ha ka jingkren jong i shaphang U Myllung Soso Tham (bam kwai ha iing U Blei) ia kaba ia broadcast na ka All India Radio, Gauhati ha ka 1.4.65 i la ong kumne: "Hadien ka snem 1841 la sdang ban buh ia ka ktien Sohra (Sohra dialect) ha ka thoh ka tar. Katba nang ia id ki por katta nang bun ki kot ba la thoh ha ka ktien Sohra. Ka ktien Sohra suki suki ka la nang san nang san bad ka la kylla long ka ktien pdeng bad standard language jong ki brierw jong ka United Khasi Jaintia Hills. La slem la ithuh ia ka da ka Calcutta University, ym kum ka Sohra dialect, hynrei kum ka Khasi language. Ia ka ktien Khasi la pynshong nongrim ha ka ktien Sohra, hynrei kam kut tang hangta. La pynwan dur pynitynnad bad pynriewspah ia ka da kaba pynrung ia kiba bun ki ktien bad kyntien ba la pyndonkam da kiwei pat ki thain jong ka Ri ha Khyrniam, ha Pnar, ha Bhoi, bad ha War. Ka ktien Khasi, namarkata, kam dei shuh ka nongkynti jong ki Nong Sohra,

hynrei ka la dei ka jong u Paid Ka Ri, naduh Rilang haduh Kupli' (ba la sot na ka Improved Instruction in Khasi-NEHU)

Ka ktien Sohra, ha kawei pat ka liang, ka kylla long ka standard language jong u Khasi namar la pynrung ia ka ha ka thoh ka tar lem bad shibun kiwei pat ki ktien kyndong ka Ri. Ka Ktien Khasi, ngi lah ban ong, ka long kawei na ki ktien 'riewlum kaba riwspah tam. Ngil lah ban bishar ia kane na ka jingdon ki ktien bad ki kyntien nongkyndong kiba ngim pat la pyndonkam haduh mynta, kum ka nuksa harum:

Ki Ktien bad ki Kyntien Khasi Nongkyndong

Tnger - Ka jingtyngshain kaba long byrngut haba jur eh ka jingshit ka sngi (War)

Rit - Sdiat (Lamin)

Bneng - phliang (Lamin)

Khyndew - Kju (Lamin)

Khyannah - humbo (Lamin)

Kynthei - Hantha (Lamin)

Dieng - twia (Lamin)

Ding - shmen (Lamin)

Lyer - Saroo

ling - Sni (Lamin)

lohi - Shohmut(Lamin)

Jaka - thaw (Lamin, Pnar)

Jain - dia (Lamin)

Lyoh - lympen(Lamin)

Marwei -shohmen (Lamin)

Maw - shmia (Lamin)

Samla - darew(Lamin)

Shynrang - Tyrma

Tymmen - Shyrkiang (Lamin)

Tympew - Pathi(Pnar)

Ah - doh (kum ka ah-masi=doh masi, ah sniang = dohsniang) (War)

Sher ksai - pyllait ksai (kum, sher ksai kot-kudi)

Sarai - smiej(War)

Jain - rad(War)

Jumai - Khmi(War)

Slem - lan(War)

Sohmynthu - sohmynten

Sohkhylam - sohbangkui

Kheh - iam(Nohwet)

Shriap - smat(Nohwet)

Krih - ~~ia~~id kai,etc(Nohwet)

War - ka jaka them ne ka lhuh(kum, ka Pat-War ka shnong Pynter = ka mut ka them ka shnong Pynter, ka War Nohwet, etc.)

Ki-yeh - u hymmen(War)

Teng-klep - mih teng bad jah noh jar(War)

Ngeh - peit(War)

Tohjaw heh - Pyrsoh - (Mawlynnong)

Tohjaw rit - Sohjet - (Mawlynnong)

Lynnai - 1a u jyntang jong u synsar uba dang ieng ha

khyndew la khot 'lynnai' bad ia u syntiew uba ju pyndonkam ha
ka sar-iing, la khot 'jongsar' (War)

Diat - mong (Sadew)

Kyrha - khot (Sadew, Mawsynram)

Oin - hep rit lane para rit (War)

Sariah - shngain (War)

Tep-lop - lam khleh biej (War)

Shyot - u moina (War)

Ryot - ba duna ka jingsngewthuh (War)

Khapai - kren (War) *Sohbar*

Bakseng - ba la rangbah (War)

Shek - jingpruid (War)

Slap Kyrtiah Prut - u slap uba pynkyla lyndang lut ia u
kba, u krai bad ia kiwei pat ki jat jingthung - u wan borabor ha
u bnai October man ka snem. (Mawpran)

Slap Kylla Maw - u slap uba kit lut ia ki maw bad ki
pieng wat haba u wan tang shiteng kynta (War).

Ngen - rung (War)

Bsiah - rung (Pnar)

Dam - shylliah (War) *Sohbar*

Kpai - btuit (Sadew)

Sylliam - syrpai, khem met (War)

Shrai - bitar (War, Pnar)

Shynnam - shisha (War)

Lar - poi (Nohwet, Mawlynnong)

Latai - ka kor kyllain ksai kotkudi (Nongkrem)

Ish - kaba pynpaw ia kaei kaei kaba itynand

Panur - rusni(Riwai)

Pohngem - ka thapbawa(Nongtyngur)

Thapbawa - ka dei ka jait thapbawa kaba pyllun bad
kaba jrong kumba shi inshi tam (Nongtyngur)

Kjat - mow (Jirang)

Bniat - lmen (Jirang)

Shniuh - suhkhlew (Jirang)

Khot - kreh (Jirang)

Lyngknot - knor (Jirang)

Mula - langkrei (Jirang)

Kmie - mu (Jirang)

ieng - hei (kum, ieng joit = hei sing) (Jirang)

Niut - bun (Jirang)

Dpei - tui(Jirang)

Dwar - haleb(Jirang)

Jingbam - theibiem (Jirang)

Jingdih - theisi(Jirang)

Mynta - hani (Jirang)

shibit - swet(Jirang)

Khiew - kumpi (Jirang)

siej - jong (Jirang)

Ai pier - ai-ei (kaba pynpaw ia ka jingsngewrit haba pan
(Nohwet)

Ai-jikoh - aiei (kham jur han ia ka ka aipier. Nuksa: 'Jikoh
seh lakor - sngewbha seh ai tymphew') (Nohwet)

Pran - ia lade (Sadew)

Phatrang - dohnud (liver) (War)

Tharu - u tangkro uba ha syndah dohnud (War)

Doon - jhieh (War) *Sohbar*

Dop - ka ktieh (War)

Pandora - wat pan dor

Dam - shylliah (War) *Sohbar*

Enroi - ym don shuh (ki ktien sha ki dong Sepngi)

Enrat - la lut khoit (ki ktien sha ki dong sepngi)

^{ia}
Jhai - Pang (Rangthong) •

Kyndor - pang malu mala (Rangthong)

Marai - pang (War)

Niurai - bym shait bha (War) *malaise*

Hurai - sngewpang (War)

Kuria - ka masari ker pyrjong (War)

Em-ma-wieh - don ne ym don (War)

Da kynshoh - leit jngoh tang tiak(War).

Da ngeh - leit jngoh tangba kham slem(War)

Samir - ia kano kano ka shnong kaba kwah ban pyniasoh
ia lade bad kawei pat ka shnong, ia kata ka shnong kaba kwah
ban pyniasoh la khot ka 'Samir' jong kata ka shnong kaba
pdiang ban pyniasoh(War)

✓ Bah Julong - Kumba bah sniang - uwei na sha khmat
bad uwei pat na shadien (Nohwet)

Symbot - ki briew kiba iit eh ia la ka jong ka riam da
kaba phai sha kadiang bad sha kamon kham tam haba phong
da ka riam thymmai (Nohwet)

Jisuwān - i hun (War)

Lwar - khlaw (Jirang)

Barei - kper (Jirang)

Smow - maw (Jirang)

Mow - kjat (Jirang)

Tei - kti (Jirang)

Sohra	Jirang	Lamin
Jain	dow	dia
Lynti	lhen	Jhen
Um	am	am
Jhur	jew	jia
ling	sni	sni
Kti	tei	ta
Bniat	lmen	lmen
Khmut	markong	markong
Shkor	Tarlang	tyrang

✓ **Jah-sutra - Jah khlem tip shuh ne ym lap shuh**

Shomphra - ktieh (Mawlong)

Jor - rah (War)

✓ **Pyrhoh - Ka jingdiang kum ka bol buh jhur, etc (War)**

Hoh - kwah ne donkam (Nohwet)

Bsieh - rymwiang(Nongkrem)

Muna - Byrmi(Nongkrem)

Pyrduit - kyrteng(Pnar)

Thyr-ein - jingshit(War)

Lakor - tympew(War)

Thoit - isbad(Nonglaidom)

Boit- khynnah rit(War)

Ka-it - interest(Pnar)

Hed - haba shong halor u kulai(Nongkrem)

Tnger - horizon(Nohwet)

Ang - u lain(Pnar)

Tyor - kyrkieh eh(Mawryngkneng), beh mrad(War)

Khynro - u samla(Pnar)

Khyllud - ka samla (Pnar)

Thiej - plan(Pnar)

Slein - sngap(Pnar)

Ka ktien Khasi, ha kawei pat ka liang, ka tyllun sawdong ia ka ri Khasi bad Jaintia na kawei ka shnong sha kawei pat da kajuh ka ktien hynrei ha ka rukom kren kaba iapher. Kum ka nuksa: haba ngi mih na Shillong ban leit sha ki thain Sohiong bad sha baroh ki dong sepngi, ki ong, 'dih'; hiar khyndiat shaphang shathie sha ki thain Mawsynram, kin ong, 'lei'; hiar shuh shuh sharum sha ki thain Tangmang bad Umniuh, kin ong 'da'; mih na Umniuh ban leit tang khyndiat kynta sha ki thain Nohwet bad Mawlynnong, kin ong, 'le'; kumba shiteng kynta na Mawlynnong sha ki thain Nongtyngur bad Lapalang, kin ong 'da'; hiar pat sha ki thain Lamin, Sohka, kin ong, 'lia'; kiew biang shaneng sha ki thain Jowai bad sha baroh ki dong Jaintia, kin ong, 'lai'; leit pat shaphang shatei sha ki thain Bhoi, kin ong biang 'le' kumba ong ki nong Nohwet. Ha kajuh ka rukom, ka ktien 'don', 'em', bad 'en' ka tyllun sawdong ia ka ri Khasi bad Jaintia kat kum ka jinglong jong ki briew bad ki shnong ba ki shong.

Lada ngi kwah ban tip ia ka tynrai ka ktien Khasi, ngi dei ban pule ia ki ktien nongkyndong(dialects). Da kaba pule ia ki ktien nongkyndong ngi lah ban pynshong nongrim ia ka tynrai ka ktien Khasi. Ka jingpyndonkam ia ka ktien Sohra ha ka thoh ka tar ka pule ka puthi kam mut satia ba ka dei ka ktien tynrai hynrei ka long ka standard language ba la ithuh da ki bor University bad ki bor sorkar. Ka jingtip bad sngewthuh ia ka ktien tynrai ka iarap ban pule ia ki jait ktien jong kiwei pat ki jait bynriew kiba lasyriem bad ka ktien Khasi bad ka kata ka iarap ruh ban pynshong nongrim nangno u Khasi u wan bad na kano ka jaitbynriew.

Kumba la ong shakhmat,u Khyrnriam, u Pnar, u Bhoi, u War bad u Lyngngam ngi dei kawei ka jaitbynriew Khasi. Ka jingiapher ki ktien bad ki kyntien (dialects) ba iakren kam mut ba ngi iapher ka jaitbynriew lane ngi wan na ka jaitbynriew ba iapher. Ki ktien nongkyndong ki iapher na kawei ka shnong sha kawei pat.Wat ha kajuh ka shnong ki don ki kyntoit kiba iapher ha ka ktien bad ka sur. Kane ka long ka rukom salonsar ha kylleng ki ri ka pyrthei.

6. KA KHYNDEW KA SHYIAP

Ha ri Khasi bad Jaintia don lai tylli ki rukiom pyniaid ia ka khyndew ka shyiap ba ia buh da u Longshuwa Manshuwa naduh hyndai hynthai. Kita ki long –Ka Ri Raid, ka Ri Kur bad ka Ri Kynti. Ka ri Raid ka dei ka khyndew jong lang lane ka khyndew ia bam lang jong u khun u hajar uba shong ha kata ka Raid bad u bym don khyndew la jong. Uno uno ne kano kano kiba shong ha ka Raid ki lah ban skut bad pyndonkam ia ka khyndew katno katno katba donkam khlem da siew dor na ka bynta ka rep ka riang ne na ka bynta ban shna iing shna sem bad kiwei kiwei de ki jingdonkam tangba kim lah ban die duh lane die shawei pat kurn la ka jong. Haba kim pyndonkam shuh, ka khyndew kan sah biang jong ka Raid. Ha kine ki sngi rnynta, bun ki ri Raid ki la kylla ri Kynti. Kane ka shong eh ha kito ki Raid kba shah ban leh kumta.

Ka ri Kur ka dei ka khyndew jong lang jong kano kano ka kur ne jait kaba dang iamih na kajuha ka kpoh. Ki ju thung ia u Rangbah kur u ban pyniaid ia ka khyndew ka shyiap na ka bynta ka kur. Baroh ki khun kynthai pateng la pateng ki ioh bynta na ka khyndew kur ban shna iing shna sem bad ban rep ban riang, kat kum ka jingai bynta u rangbah kur.

Ka ri Kynti ka dei ka khyndew jong u lane ka briew shimet. Ki lah ban leh katba sngewbit ia ka khyndew jong ki. Ka ri Kynti ka long kaba thied da ka dor ka spah bad da la ka jong ka umsyep. Ym don mano mano ba lah ban tuklar.

KA JINGPYNDONKAM IA KA KHYNDEW:

Ha ki phew snem bad ki spah snem kiba la leit noh, ki briew ki pyndonkam ia ka khyndew tang na ka bynta ban shna iing shna sem bad ban rep ban riang. Hynrei ha kane ka juk mynta ia ka khyndew la pyndonkam na ka bynta ka madan ialehkai, ka surok kali, shna karkhana bad la tih ia ka khyndew na ka bynta u dewiong, mawshun, bad kiwei kiwei ki mar poh khyndew bad ki tih ruh na ka bynta ban ioh shyiap bad maw ban shna iing shna sem.

Ha ki snem kiba la leit noh, kham bun ki briew kiba shong ha ri Khasi bad Jaintia ki long ki nongrep. Ha kine ki sngi mynta, ba la shai ka pyrthei, ki briew ki la sdang ban trei ia ki kam kiba pher bapher. Kito kiba la nang la stad ki kham ia beh ia ka kam Sorkar.

A.KA REP KA RIANG:

Ka rep ka riang ka long kawei na ki kam ba kongsan eh ha ka ri Khasi bad Jaintia. Haba shu shim kyllum ki briew kiba im ha ka kam rep ki long kumba phra phew na ka shispah.

Haba kren shaphang ka jinglong ka mariang bad ka khyndew, ka ri jong ngi ka long kaba iadei bad seisoh bha bad kaba lah ban thung bun jait ki jingthung kynthup ia ki jhur bad ki soh. Hynrei haba ngi phai pat sha ki jaka kiba bit ba biang ban rep ki duna haduh katta katta, ka lah ban long tang kumba arphew bynta na ka shispah bynta. Ka daw jong kane ka long ba bun ki jaka ki bym long rep: don ki jaka kiba bun u Mawshun, u dewiong bad kiwei pat ki mar hapoh khyndew, don ki jaka kiba shlei da u shyiap bad u maw bad bun kiwei pat ki jaka kiba khohruh khohram kiba dap da ki riat ki ram.

Ki jingrep ba kham kongsan ha ka ri jong ngi ki long: U kba, ka riwheadem, u krai, ka shriew, u phan myngngor bad u phankaro . (Ha kine ki sngi mynta, ym ju don shuh kiba rep krai). Ha ki thain Jaintia, Ri War bad Ri Bhoi ki jingthung ba kongsan ki long u kba, u kwai, u tympew, u sohniamtra, u sohmrit khlaw bad kiwei kiwei. Nalor kine, ha ka ri jong ngi ki thung laiphew jait ki soh bad ki jhur ki jhep. U synsar uba ju long mynno mynno u mar khlaw uba long ha ki riat ki ram, u la kylla long mynta uwei na ki jingthung bakongsan uba bsa ia ki nongrep.

Ki Nongrep jong ngi ki pyndonkam borabor da ka eit-masi, eit- sniang, eit- kulai bad kiwei kiwei ki jait sboh ba la pynlong na u phlang bad ki niut ki nier na ka bynta ban thung phan bad kiwei kiwei ki jait jingthung. Ka khyndew ka sbur bha bad ki jingthung ruh ki seisoh shikatdei. Ym ju pynlehnohei ia ka khyndew lada rep bun ne syllai. Wat ha ka rep shyrti ne jhum ruh ym ju pynlehnohei ia ka khyndew. Ki jingthung kiba mih na ka khyndew ki long kiba bang ba shngiam bad ki long ruh kiba tei ia ka met. Ki briew ki long kiba koit bakhiah krat bad kiba khlain ba ksah bha. Ki long kiba im tymmen shongprah shongshang.

Dang khyndiat snem naduh ba la sdang roi ka jingstad saian, ki briew ha ri Khasi bad Jaintia ki la sdang ban pyndonkam ia ka sboh dawai, kum ka Ammonium Sulphate, Uria, Super Phosphate bad kiwei kiwei ki jait dawai ba pynmih thymmai na ka por sha ka por. Haba pyndonkam da kane ka jingstad saian, shipor ka khyndew ka seisoh bha kham bun shah ban ianujor bad ka rukom rep kaba mynshuwa. Hynrei katba nang mih ki snem ka jingpynmih soh ka nang duna nang

duna bad tang khyndiat snem ka khyndew ka la kylla 'dew-shrah bad eh kum ki maw. Kumba long mynta bun bah ki jaka lum, ki pynthor kba, ki kper bad ki syllai, kiba ju long, mynno mynno kiba seisoh, ki la kylla 'dew - shrah bad eh kum ki maw. Ka daw jong kane ka long ka jingpyndon jhulum ia ka sboh dawai. Ki Nongrep Khasi khamtam ki nongrep nongkyndong ki dang sahdien bad kim pat sngewthuh ban pyndonkam ia ka sboh dawai ha ka rukom kaba dei. Ka jingmih na kane ka pyntroin lut ia ka khyndew kaba seisoh. Na ki dak ki shin, kumba ka paw mynta, bun bah ki jaka lum, ki pynthor kba bad ki kper ki shu sah shrah namar bym long shuh ban rep lane lada rep ruh ym lah shuh ban pynmih dor kumba ka dei ban long. U kba bad u phan kiba long mynno mynno u thied snam jong ka jaitbynriew kiba kyrshan ia ka ri bad ka jaitbynriew, ki la kylla long mynta tang ki jingbam rneng. Ki nongrep kim smat shuh ban rep namar ka khyndew kam seisoh. Nalor kata, ka jingtih dewiong, tih mawshuh, tih shyiap, tih maw bad kiwei kiwei ki mar poh khyndew bad ka jingpom pathar ia ki khlaw wah baheh bad barit ka la pynjulor bad pynjot thiaw ia ki lum ki wah bad ia ki jaka rep. Nalor kane ka jingtih pathar ia ka khyndew ha ki jaka lum bad ki them, haba wan u slap uba jur u kit lut ia ka khyndew bad ka sboh baroh sha ri dkhar. Lada ngim pyrshang ban iada na kane, ka ri jong ngi kaba ju long mynno mynno ka ri kaba seisoh. shen kan sa kylla long ka ri shyiap.

Ha kine ki sngi mynta haba ngi iaied ha ki nongkyndong kylleng ka ri Khasi bad Jaintia ngi ioi ia ka jingeh ba ki khun samla ki iakynduh. Kito kiba kyndoi jakpoh da ka rep ki la lyniar namar ka jingbym seisoh shuh ka rep, nalor kata, ka jinglut ha kaba thung bad ka jingmih na ka rep kim iadei dor

shuh, la kham bun ka jinglut ban ia ka jingioh. U phan uba ju pynmih mynshuwa shiphew shah mynta um lah shuh ban pynmih wat tang shishah ruh. Ka dor ka long kaba tad, bun kiba iehnoh ia ka rep namar ka bam than ia ka bai seng. Kito kiba ju rep kba ruh ki la ngiah ban rep namar ba bun ka jinglut ban ia ka jingioh. Kito pat kiba ju trei khlaw ki la sdang sakma shane bad shawei namar ki khlaw ki la sdang synlen. Kito kiba im da ka bylla sngi ki la lamwir namar ka duna ka jingbylla. Bad kito kiba la pyndep ia ka jingpule da ka jingkhmih lynti ban ioh kam sorkar, ki la shu thad sngi kum ki Wangriang namar bym ioh kam sorkar- Shano ka jaitbynriew kan poi bad kumno kan long- ngi ap sa tang ia ka por. Ki Nongialam jong ngi ki ju pyrta borabor ban pynim ia ka ri bad kyntiew ia ka jaitbynriew – aiu ki la leh?.

B. KA SPAH NA KI MAR HAPOH KHYNDEW:

Ka ri Khasi bad Jaintia ka long kawei na ki ri lum kaba riwspah ha ka jingdon ki mar hapoh khyndew. Ki mar kiba kham kongsan ki long u dewiong, u mawshun, u siliminite bad ki dewbyrtha. Dang shen la shem ruh ia u Uranium ha ki katto katne ki jaka ka ri Khasi. Kiwei pat ki mar khyndew ki long u copper, ka ksiar, lead bad zine, u granite bad kiwei kiwei. La ong ba ki mar poh khyndew tang ha ki thain Jaintia ki long kumne harum:-

(a). Mawshun..... 402.00 Millian Ton.

(b). Dewiong.....30.65 Millian Ton.

(k). Kaolin.....1.30 Millian Ton.

(a). **MAWSHUN**: I Bah Sparbah Lyngdoh i ong ba kat

kum ki Geological investigations la antad ba don haduh kumba 4,000 Million ton u mawshun ha ka jylla baroh kawei. (Khmih na ka kot ka " mariang bad ka spah jong ka P.32). Ia u mawshun la pyndonkam na ka bynta ban shna dewbilat bad ia uba kham khuid la pyndonkam na ka bynta ban shna ` calcium carbonate' bad calcium carbide' bad kiwei kiwei de ki jingpyndonkam. Kumba long mynta, ia u mawshun la tih kham bun na ka bynta ban phah sha Bangladesh bad kiwei kiwei ki jaka ha ka ri India. Ka spah mawshun ka long kaba khraw hynrei ka ri bad ka jaitbynriew kam ioh jingmyntoi ei ei namar ngim don ki karkhana kiba biang. Ka jingmih ka long ba kiwei pat ki jylla khraw spah ka ri India bad ki bar ri ki ioh khlong ei kum ki kruin ia u mawshun ka ri Khasi bad Jaintia. Kan sa poi ka por ba u mawshun ruh u lah ban lut noh da ka jingiai khlong jong kiwei pat ki jaitbynriew ba bun paid.

(b) **DEWIONG:** I Bah Sparbah Lyngdoh i ong ba kat kum ka "Estimated Reserves," u dewiong ha ka jylla baroh kawei u don kumba 530 Million Ton. Ha ka ri Khasi bad Jaintia u don tang kumba 170 Million Ton. Uba bun u don ha Garo Hills.

Kumba long mynta ia u dewiong la tih ban shalan sha ki Jylla bapher bapher jong ka ri India bad Bangladesh. Ha ka ri jong ngi la ioh ban pyndonkam tang ha kaba thang ding shna Mawit bad dewbilat. Lehse, ka jaitbynriew jong ngi ka lah ban pyndonkam tang shi bynta bad khyndai phew khyndai bynta la ioh ban pyndonkam ei da kiwei pat ki jaitbynriew na ka bynta ki jingpyndonkam bapher bapher.

Nalor u mawshun, u dewiong bad u sellimanite la don mynta ka jingpyrshang ban tih sa ki dewbyrtha (Kaplin), u uranium bad kiwei kiwei ki mar khyndew. Khlem pep yn sa khlong lut ia ki mar khyndew baroh ha ka ri Khasi bad Jaintia.

Ka jingma kaba ap mynta ka long ka jingwan tuid kynsan ki jaitbynriew kiba pher bapher-ki riwulum, ki nongwei bad ki mynder ri na kylleng ka ri India bad nabar ri ruh ban wan shong basa ha Sor Shillong, ha ki khappud ka ri Khasi bad Jaintia bad ha ki jaka pdeng jong ka ri khamtam ha ki jaka ba jur ka tih dewiong, tih mawshun, tih surok bad ki jaka ba don ki karkhana. Ka ri jong ngi ka long da shisha ka ri kaba rit, kaba seisoh, kaba riwspah bad ka jaitbynriew kaba tang shitroh. *Ngi sheptieng ba kine ki jaitbynriew kiba wan shongbasa kin sa kylla long trai ri bad ba ma ngi kiba long ki trai ri ngin sa kylla long ki mynder ri.* Ka jingiai kylla ka jingsynshar ka buh borabor ia ki rit paid ha ka jingeh bad jingma.

Kumba ka long mynta, ki jaka shong jaka sah ki la nang duna la jan man la ka shnong. Ka jaka rep ka la nang sah shrah bad nangduh, ki wah ki la nang tyrkhong, ki umpohliew ki la mgat lut bad sa tang katto katne por bun ki shnong kin nym ioh shuh wat tang ka um dih ruh. Ka jingpom pathar ia ki khlaw bad ka jingtih jhulum ia ki mar poh khyndew ka la pynsniew lut ia ka ri bad ka jaitbynriew. Kane ka pateng bynriew mynta i kumba kan bam duh noh baroh ia ka spah kaba don ha sla bad poh khyndew. Hato ngi ju pyrkhat ia kaapot ka pateng bynriew Khasi ka ban wan?

Ka jingma kaba sniew tam kaba ap ia ka ri bad ka jaitbynriew ka long ka jingiadie iathied sop sop ia ka khyndew ka shyiap, ki iing ki sem, ki dukan iew, ki kali bad kiwei kiwei. La ngim ioh da ki dak jingkhein kiba thikna hynrei la ong ba

don bun ki Khasi kiba die duh sop sop ia la ka jong ka khyndew ka shyiap, ki iing ki sem, ki dukan iew, ki kali bad kiwei kiwei ha ki nongwei. Ka jingdie ka dei sha ki nongwei hynrei la pyndonkam da ka kyrteng Khasi ha kata ka rukom ban ym don mano mano ba lah ban shem. Don napdeng ki Khasi kiba die ia ka khyndew ki die ruh ia la ka longrynieng da kaba die noh ia ka kyrteng ha ki nongwei. Ka kyrteng Khasi ka long kaba lah dor bha ha iew ha hat hapdeng ki nongwei. Kane ka jingdie sop sop la ong ba ka long naduh u paitbah haduh ki nongialam ne nongsynshar ka ri. Ki paidbah ki die namar ba ki duk, ki nongkhaii ki die ban pynheh ia ka kam khaii, bad ki nongialam ne nongsynshar ka ri ki die ban ioh peisa ban pynskhem ia lade ha ka kam long nongialam. Kane ka jingiadie iathied sop sop ka jur bha ha ka Nongbah Shillong bad kiwei pat ki nongbah ka ri Khasi bad Jaintia. Mynta ka la sdang ban par shaduh ki jaka nongkyndong jong ka ri. Ka jingdie noh ia ka khyndew ka shyiap bad ki iing ki sem ha ki nongwei ka long ka jingdie duh ia ka ri bad ka jaitbynriew. Ngim tip la ki bor sorkar ki ju pyrshang ban wad bad shem ia kane. Mynta kaba donkam eh ka long ia u paitbah bad ki Seng Bhalang ban wad bad shem ia kane khnang ban nym buh ia ka ri bad ka jaitbynriew ha ki jingeh lashai la shisngi. Kawei kaba ngi dei ban kynmaw bad kata ka long ba katba ka jingsynshar riwlum ka dang biang dang iaid bha kane ka jingiadie iathied sop sop kan nym paw hynrei lada jia ba ka wan ka jingsynshar nongwei baroh ka khyndew ka shyiap, ki iing ki sem bad ka kyrteng Khasi kaba la die duh kan long ka jong ki nongwei. Shisha, lada ka long kumta, ka ri bad ka jaitbynriew Khasi kan sa kylla long kum ka ri Lum Tripura lane kum ka ri shyiap Palestian.

(K) KA SPAH NA KI KHLAW KI BTAP:

Ka Ri Khasi bad Jaintia ka long ka ri kaba riewspah ha ka jingdon ki mar khlaw. Ngi don bun ki khlaw ki btap kynthup ia ki khlaw dieng -kseh, khlaw dieng- met bad ki khlaw kiba dap da ki siej bad ki shken. Ngi don ki jait khlaw, kum ki khlaw kyntang, khlaw sorkar, khlaw shnong, khlaw- kur bad kiwei kiwei. Ha kine ki khlaw don bun ki jait dieng- kiba heh bad kiba rit- don ki mrad kiba pher bapher, don ki jait sim kiba phylla, don ki jait khniang laiphew jait, don ki thapbalieh ba bun rong bad kordor, don bun rukom ki jait kynbat kiba long dawai bad ki bym long dawai, don ki soh khlaw kiba bang bad kiba shngiam bad bun kiwei pat ki jait jhur bad jingthung kiba shu long hi ha khlaw.

Kumba long mynta ka spah kaba khraw eh kaba ngi lah ban ioh ka long da kaba pynmih ia ki dieng sawdong- dieng kseh bad dieng met. Kiwei pat ki dieng, kum ki diengbti, diengngan, dienglieng, diengsning, diengsohli-ia, diengtusei, diengsal, diengrai, diengsoh manil, dieng sohphan; ki long ki dieng kiba kordor kiba ju pyndonkam na ka bynta ban shna iing, shna shuki, shna miej, almari bad kiwei kiwei ki jingdonkam. Ha ki khlaw jong ngi don bun ki dieng kum ki dieng- lamaki, dieng - sohliia, dieng soh- mylleng, dieng jalwan kiba pynmih ki sla bad ki soh kiba pyndonkam na ka bynta ban aironng ia ki jain ki nep, ki khiew bad kiwei kiwei ki tiar, ban shna dawai bad kiwei kiwei ki jingdonkam. Ym tang katta don bun jait ki jait kynbat kiba long dawai bad kiba lah ban shna jingiewbih laiphew jait.

Ki jait jhur kiba ngi ioh na ki khlaw ki long: jabuit, jakhain, jakhait -rap, jakhria ne jamiaw, japied, jada, ja-ngew, jahynwiat,

ja-iaw, jajar, jajew, jalyngkhan, jalmut, jalynniar, jalynnoh, jalynsheer, jamaw, jarain, ja rynglud, jathang, jatira, jamyrdoh, khlingsyiar, hursheng, ja-ut, bad kiwei kiwei ki jait jhur khlaw.

Nalor kine don bun jait ki soh khlaw kiba shu long hi bad don ruh kiba shu thung, kita ki long: Soh brai, sohbrap, sohbroi, sohkhur, sohkhylam, sohkhylum, sohkyrsiew, sohkwit, sohngam, sohiong, sohjhalla, sohlang, sohlapa-iat, sohlew, sohliia, sohlyngkait, sohma, sohmanir, sohmod, sohmylleng, sohmyndong, sohot, sohphi, sohpieng, sohpriam, sohshanglew, sohskan, sohshur, sohniamtra, sohryngkham-sohum, sohpaipuraw, sohshiah ne sohphairew, sohben, sohkhawiong, sohmluh, soh-jylih, sohlong, soh-lyngdkhur, soh-myngngor, sohpei, sohphoh Nongkhlaw, sohpong, sohshan, sohntyntoi, sohpora bad kiwei kiwei pat ki soh. Na kine ki soh, don kiba long ban shna dawai bad kiwei pat na ka bynta ban bam, ban shna ashar, shna umsoh bad bun kiwei kiwei ki rukom pyndonkam. U Sohniamtra u long uwei na ki soh kiba wallam ka spah kaba khraw man la ka snem ia ka ri bad ka jaitbynriew. U kwai u long uwei pat na ki jait soh khlaw uba long ka jingkyrshan kaba khraw ia ka ri bad ka jaitbynriew khamtam ki briew kiba shong ha ki khappud ka ri Khasi - Jaintia bad Bangladesh. Ka jingmih shisnem shisnem ka long kumba arphew klur tyngka.

Ki jait sim kiba ngi lah ban shem ha ki khlaw ha ri Khasi bad Jaintia ki long: ka lyngdkhur, u kbeit, ka kuku, ka dkhoh, ka tyngab, u khlieng, u pukni, u swalia, kaslieh, ka kyllabadur, ka lyntait, sim krai, sim kyllai dohdit, sim puhdieng, sim puhwieh, sim sohphoh, sim tung, sim tyngwieng, sim didiaw, sim paipuraw, ka lorni, sim jylopp, sim syiem-balieh bad bastem, moina, kyrkhiah (u kynja moina uba kren briew), sim

rynniaw, langbyrkaw, ka saro, sim puhnei, sim phniang ja-iing, ka sim snad, ka sim leit iew, ka shain bthuh, ka tyut, ka sain, ka syiar khlaw, ka sim sier, u iar tung, iar khiar, shyawat- iong bad bthuh, ka sim khar bad don bun kiwei kiwei pat ki sim kiba wan na ri dkhar kiba shongkai shipor bad ki phet noh.

Ki mrad kiba lah ban shem ha ki khlaw ka ri Khasi bad Jaintia ki long: U khla, ka dngiem, u hati, ka sier, u bthong, ka skei, u myrsiang, u niang khlaw, u ksar, u dieng khied, u bsong, u bshad, u phyllad, ka kyrbei, u 'la thapsim, ka rabbit, kshih, kui, risang- dieng bad risang khyndew, ki khnai(ki don bun rukom) bad don bun kiwei kiwei pat ki mrad kiba ngim lah ban niew kyrteng lut.

Nalor kine kiei kiei kiba ngi la niew kyrteng haneng, ngi shem ruh bun ki jait khniang, jait skain, bad kiwei pat ki kynja jingthaw ba im ba par kiba shong ha ki khlaw ha ka ri Khasi bad Jaintia.

Haba ki khlaw ki shong rben, ka iarap ban bat ia ka jingsyaid, ia u slap bad ka lyer. Ka jingdon jong ki khlaw ka iarap ruh ban pyniaid beit ia ki aiom kumba ki long. Ha kito ki phew snem kiba la leit noh ngi dang ioh mad ia ki saw aiom, ka pyrem, ka lyiur, ka synrai bad ka tlang. Ngii dang iohmad ia ki jhur khlaw kiba bang ba shngiam, ngi dang iohsngew ia ka jingkyndud ki khniang, ia ka jingpah sngewtyinnad ki sim, ka jingpyrta ki mrad khlaw, ka jingkhii win ki jakoid. Ngii dang ioh mad ia ki umpohliaw kiba mih na ki lum bad mawsiang, ngi dang ioh jngi ha ki pung, ki phud wah bad ki wah bah bad ngi iohsngew ruh ia ka jingbyrthen ki kshaid bad kumta ter ter.

Ha ki sawphew bad sanphew snem ba la leit, ki brierw ki pom dieng, lada na ka ri raid ne ri kur ne ri kynti ki da jied, lada

dei ba ki pyndonkam na ka bynta la ka jong ka iing, ka shnong ka thaw ne na ka bynta ban khaii ha la ka jong ka ri- kim ju pom katba lap ba shem ki da tyngkai ia ki dieng kiba dang lung, dangim bad ki kham iabeh ban pom ia ki dieng kiba la iaw, kiba la iapstai, ne iapieng, kiba la pyut ka dyngkhong, kiba la sator ki thied ki jaw, kiba la khohsne, kiba la dkut kliar, kiba la khoh sapied, kiba la shong ksain ne niang byrnai ha ki metbah bad kiba la mangkariang. Namar ka jingieid jong ki ia ki dieng ki siej, ka khlaw ka btap ka shong rben, ka khyndew ka seisoh bad ka shnong ka thaw bad ka ri hi baroh kawei ka shong syaid.

Lada iathuh ia ki Samla ki juk mynta ia ka spah kaba ioh na ki khlaw ka ri Khasi bad Jaintia, kumba la kdew hangne, lehse kan long ha ki tang ka jingphylla bad ka jingphohsniew. Kumba long mynta, kin ym lah shuh ban iohi ia kiei kiei kiba la kdew hangne, namarba ym don shuh ki khlaw kiba heh bad rben, kumba long mynshuwa, hynrei ki lah ban iohi sa tang ia ki maw, u shyiap bad ki lum kiba synlen.

Kane ka jia long namar ha kine ki arphew bad laiphew snem kiba la leit noh, ka la don ka jingpom pathar ia ki dieng ha khlaw naduh kiba heh haduh kiba rit. Ym tang ia ki dieng, ia ki syntiew khlaw, ki nuit maw bad wat ia ki thied dieng la phut ne jynrat lut na ka bynta ban khaii. Ki mar khlaw naduh ki dieng ki siej bad haduh ki kynbat bad ki nuit khlaw ka ri Khasi bad Jaintia ki long kiba iaid iew bha ha ka jylla baroh ka ri India bad shabar ka ri. Kumba long mynta, ki khlaw kiba dang sah ki long sa tang ki khlaw sorkar, 'Law - kyntang', khlaw shnong bad katto katne ki khlaw ri kynti. Lehse kaba sah ka lah ban long sa tang kumba shiphew bynta na ka shispah bynta ki khlaw ha ka ri baroh kawei. Kumba long mynta, ym don shuh

ki khlaw kiba rben, ym don shuh ki dieng heh, ym don shuh ki dieng kiba rem dor, kiba sah ki long sa tang ki dieng kiba la iaw ha ki khlaw Sorkar bad kiba dang lung ha ki khlaw ri kynti.

Ha kine ki khyndiat snem, ka la don ka jingpyrshang na ka liang ka sorkar bad ki Seng Bhalang ban pynkhih ia u paitbah ban thung dieng. Nga sngew ba donkam ban don ka Seng Thung Dieng kaba khlain ban pynshlur bad pynkhih paitbah ban iathung dieng ha ki jaka baroh kiba la sah shrah, ban tyngkai ia ki khlaw kiba dang sah bad ban hikai ban nym tih pathar ia ka khyndew ka shyiap ne ki mar poh khyndew. Da kane kan iarap ia ka pateng bynriew ka ban wan ban ia ioh bynta lem na ki jingkyrkhu kaba U Blei u la theh ha ri Khasi bad Jaintia.

7. KA SYNSHAR KHADAR

Ia ka ri Khasi bad Jaintia la ju tip mynshuwa kum ka ri Laiphew Syiem bad Khadar Doloi. Ka long ka Ri Lum kaba khraw, kaba itynnad bad kaba riewspah. U Ńi u Kong u saindur ia kane ka ri ban long ka ri synshar paitbah ha kata ka rukom ba naduh u Syiem haduh u paitbah ki don ka bynta bad ka jingkitkhlieh ban tei ia la ka ri bad ka jaitbynriew. Baroh ki nongshong shnong ki don kajuh ka bor, ka burom bad ka jait ka kynja ha ka imlang sahlang.

Nalor u Syiem, u Doloi, u Wahhadar, u Lyngdoh, don sa ki Myntri, ki Sordar, ki Basan, ki Rangbah Shnong ne Tymmen Shnong, ki Rangbah kur, ki Rangbah Dong bad kumta ter ter. Baroh kitei ki nongsynshar ki don la ka jong ka jong ka bynta

ha ka Hima, ka Shnong, ka Dong bad ha ka imlang sahlang. Kane ka rukom synshar paitbah ha ri Khasi bad Jaintia ka long kum ki kyrwoh kiba suhthied ter ter naduh ki kam iing kam sem haduh ka kam hima sima. Ha ka hima ba synshar da u Syiem, ia u Syiem la khot ' U Syiem U Kmie'.

Ha ri Khasi bad Jaintia naduh ki durbar shnong haduh ki durbar hima, ka rukom ha kaba jied ia ki nongsynshar, ka jingpyniaid ia ki kam ki jam ha ka shynshar ka khadar, ka long kaba ia syiem bha na kawei ka shnong sha kawei pat. Barabor, la ju jied ia ki nongsynshar napdeng ki briew kiba la kham rangbah ne kham iaw, kiba don ka main rangbah, kiba don ka nia ka jutang, kiba don burom bad kiba don ka nam ba bha. Ha ki longshuwa manshuwa, ka nam babha ka kham khraw bad kham don bor ban ia ka tyngka— ka tyngka kam ioh jaka ha ka dohnud jong ki- lada ha u nongjied ne u nongshah jied. Namarkata, ka hok ka ieng rasong bad ka burom u briew ka tyngshain. Baroh ki nongsynshar ki dei ban synshar katkum ka mon ne ka rai jong ka durbar pyllun jong ka shnong ne hima.

Ha ki por mynshuwa ngi ioh ia ka bor, ka burom bad ka jingtip briew tip blei ki nongsynshar Khasi naduh u Syiem haduh ki rangbah shnong. Hapoh kine ki khyndiat snem ka la don ka jingkylla kaba khraw ha ka kam synshar khadar. Kumba paw mynta, naduh ba la wan ka jingsynshar laitluid ha ri India, i kumba ka jingsynshar paidbah India ka la klun noh ia ka rukom synshar paidbah khasi kaba la saindur da u longshuwa manshuwa. Ka jingsynshar laitluid kaba shisha kaba la ju long baroh shi katta ka la kylla long noh ka jingsynshar laitlan. Kata ka hok ka sor kam don shuh, ka jingtip briew tip blei kam don shuh. ka jingiatip lem kam don shuh, ka akor bad ka burom

longbriew manbriew kam don shuh, ka mynsiem ieid ri kam don shuh, ka jinglong kawei ha ka ri kam don shuh bad kaba sah la long tang ka ieid shimet bad ka jingjot.

U paidbah u ud ia u nongsynshar ba u shet kylla, u nongsynshar, ha kawei pat ka liang, u ud ia u padibah ba u bam kylla. Ha ka por elekshon, ka por ba dei ban jied ia ki nongmihkhmat ne nongsynshar ka ri, ki nongjied, lehse, kim ju pyrkhath kiba kumno ki briew kiba dei ban long ki nongsynshar ka ri. Kum ha kane ka por ki nongjied ne u paitbah ka ri ki pyrshang pynban ban shim kabu na ki nongialeh elekshon (Candidate). Kito kiba im sngi ka thap ja kyntien ki leh kumta da kaba par sian ban ioh ja kyntien na ki nongialeh elekshon katba dang shongshit ka jingpynkhreh elekshon, kito kiba kymi ka dihi kiad, ki dawa hi khui ban ioh dihi, kito kiba la mar mlien ban khwan peisa, ki am hi khith kum ka jynrein ban ioh peisa. Ki briew kiba la thmu ban ialeh elekshon, ki hap ban pynsgewbha bad pynhun ia ki nongjied da kata ka jingkyrmen ban jop ha ka jingialeh. Ki hap ban pynlut da ki phew hajar bad da ki lak tyngka tang na ka bynta ban khawai bad ban thied da ka tyngka ia ki nongjied khamtam ia kito kiba kwah tyngka. . Kum ha kane ka por, ka dor ki nongjied kam iapher ei ei bad ka dor jong ki mrad. Lehse ki mrad ki kham kor ban ia ka dor briew.

Haba ngi phai sha kane ka liang, ka ri bad ka jaitbynriew jong ngi ka dang sah dien haduh katta katta. Tang na ka daw ka elekshon, don ki iing kiba iapait iapra, don ki briew kiba kylla nongshun paramarjan, kiba iashun para briew bad don ruh ki shnong kiba iapait iapra. Hooide, ka jingpynkhreh ia ka elekshon ka long tang khyndiat sngi hynrei ka jingmih na ka, ka pynpyut ia ka ri bad jaitbynriew.

Kawei pat kaba sahdien ha ka jaitbynriew Khasi ka long

ba don katto katne kiba shah rem ha ka elekshon, ki kylla long noh tang ki riew madan- ki duh noh ka bor ka burom bad ym don ba niewkor shuh ia ki. Kito pat kiba jop ha ka elekshon ki klet noh ia la ka ri bad ka jaitbynriew bad ki kynmaw ieid tang ia ka shuki bad ki kali. Kane ka jia long namar ba ka kam synshar ri ka la hiar dor bad ka la kylla long noh mynta tang ka kam khaii. Ki nongkhaii kin hap ban trei shitom ban pynim bad pynriewspah ia lade bad ia la ka ri katba ki nongsynshar ri kim donkam ban da trei shitom hynrei kin thaw da ki lad baroh, lada kaba hok ne ka bym hok, ban pynriewspah ia lade da ka dor bad ka spah jong ka ri.

Ia ka jaitbynriew Khasi la niew kum kawei na ki jaitbynriew kaba la synshar da ka akor ka burom, ka jingtip briew tiplei, ka hok bad ka sot, ka nia ka jutang bad da ka ain longbriew manbriew. La niew ruh kum kawei na ki jaitbynriew kaba khraw jutang bad kaba proh jabieng. Ka jingshisha jong kane ka long ba u Khasi u don ka sap kaba kham pher ha ki phang trei kam baroh. Ki briew kiba don burom, kiba tipbriew tiplei, kiba biang ka kyrdan jingpule bad kiba don ka sap kaba biang ki kloï ban iashim bynta ha ki kam bapher bapher jong ka ri— kaba phylla ka long ba kiba kham bun kum kita ki kiar ban iashim bynta ha ka kam nongialam ne nongsynshar ri. Lane lada don kiba kum kita, u paitbah jong ka ri lehse um pat nang ban pdiang bad ban niewkor ia ki. Namarkata, ngi khmih lynti ba ki briew ki ban synshar ia ka ri jong ngi kin long ki briew kiba kumno? Toi ha ka jingshisha, ka kam nongsynshar ka long ka kam kaba don burom bad kaba kyntang - kaba ktah ia ka iap ka im jong ka ri bad jaitbynriew.

Haba ki briew ki kren shaphang ka Politics, ki mut ban ong ia ka jinglong MDC, MLA bad MP. Ha ka jingshisha, ka

jingmut ba iar jong ka ktien Politic (Greek Word) Polis, ne politeo ne Politicia ka long ka jinglong nongshongshnong,ka jingpyniaid ia ka kam shnong kam thaw, ka jingiaid beit ha ka jingiatip lem babha, ka jingiarap lem ia ki para briew ha ki liang baroh, ha ka jingiatreilang bad ki bor synshar na ka bynta ban tei ia ka ri bad ka jaitbynriew. Ka ktien hi da lade ka long kaba bha, kaba khuid bad kaba kyntang, ka kylla long kaba jakhlia namar ki briew kiba tngit ki wan rieh tngen ha ka.

Kumba long mynta, ka ri bad ka jaitbynriew ka im namar ba don ki riew ieid ri kiba aiti mon sngewbha ia lade ban shakri ia ka ri lyngba ki Sengbhalang, ki Seng trei mon sngewbha bapher bapher, kiba trei ha ki kam sorkar, kiba trei ha ki skul pule, kiba trei lyngba ka thoh ka tar, ki kot khubor bad kiwei kiwei ki kam babha. Hynrei haba ngi phai pat sha ka kam synshar ri - (Politic) ngi i duh jingkyrmen bad astatien ruh ia ka lawei jong ka ri - borabor ngi ioi tang ka jingiapaif japra, ka jingiabishni, ka jingkwah bor, kwah burom, kwah spah, ka jingpyrshang ban pyniapher para briew bad ka jingieid shimet. Ngi khmih lynti ba kane ka pateng mynta kan leit noh bad ka pateng ki samla kan wan ban saindur thymmai ia ka synshar khadar ha ka ri ha ka rukom bad ka nongrim u Longshuwa Manshuwa jong ngi. **Ki briew kiba ieid shisha ia la ka ri kim dei ki briew kiba la jied da u Paidbah hynrei ki dei ki briew kiba jied hi da lade ban aiti ia la ka jingim ban shakri ia ka ri bad ka jaitbynriew.**

8. KA SPAH BYMHOK

(a) Ka Spah: Ka spah ka thew ia ka peisa - tyngka, ki iing ki sem , ka khyndew ka shyiap bad ia kiei kiei baroh ba niew kum ka spah. Ha ka rukom pyrkhath Khasi, ki khun ki kti bad ka jingkoit jingkhiah la niew ba' ka long ka spah. Haba iakynduh iano iano ha lynti, ki riew tymmen kin kylli, 'Phi ki kur jongno ? nangta ki khun jongno?', nangta, phi iadon katno shipara? Lada ki ong, 'Ngi ia don hynniew ngut ne shiphew ngut', kin ong ' Phi kiba riewspah'. Kim ju kham kylli kyrteng. Ha ka rukom Khasi, ka kyrteng kam da long kaba donkam khamtam haba pyndonkam ha iing ha sem, lane ban khot kyrteng iano iano ki sngew long khlem akor ne sngew long tohmet kumno re. Ki kham sngewbang ban pyndonkam da ka kyrteng sin, kum ia ki briew kiba la rangbah bad don khun, kin ong ' U kpa uta uta,' lane ia kiba dang samla bad dang khyannah, kin ong, ' Bah' 'Kong' bad kiwei kiwei ki kyrteng sin. Kumba la ong haneng, ha ka rukom pyrkhath Khasi ka iing kur lane ka iing kaba iaroi parum pareh, kaba biang ka ja ka doh, kaba shongsuk shongsam, kaba lakot iakhiah kat, kata ka long ka spah. Kane ka lah ban iapher na kata ka 'Standard of Living' kaba ong ki Phareng. Ha kane ka juk mynta, ba la shai ka pyrthei, ka kyrteng ka la sdang ban iaaid kam khamtam haba iatrei ia ki kam bapher bapher.

(b) Kamai ia ka hok: Kane ka long ka ktien kaba shongsbai ha ka rukom pyrkhath Khasi. Ki ' riew tymmen ki ju pyndonkam borabor ia kane ka ktien khamtam haba sneng ia ki khun ki ksiew pateng la pateng. Kaba u Khasi u pyndonkam ia ka 'Hok' ka 'So' ka thew ia ka jingbha, jinglong khuid bad ka

jingshisha. Ka hok ka thew ia ka longrynieng kaba kynthup ia ka ktien, ka jingmut jingpyrkhat bad ka dohnud u brieve. Haba u Khasi u ong 'Kamai ia ka hok' u mut ban ong ba ka jingim ka dei ban long kaba synlar, kaba hok bad kaba shisha, kaba ym dei ban long da kumwei pat. Ia kiba kamai ia ka hok, ki parabrieve ki ia pyrto, ki da kyrkhu kyrdoth bad u Blei ruh u kyrkhu. Kaba pyrshah ia ka hok ka long ka pap ka sang, kaba lamler bad shukor, bad ki para brieve ki tim ia u bym hok, uba arsap bad u 'suid-tan u pynynjar.

(k) Ka peisa ioh-ei: Ka mut ka peisa kaba shu ioh khlem da trei shitom ne khlem da kamai da la ka jong ka umsyep. Ka lah ban long ka peisa kaba shu ioh khar ei na madan madiah ne ka peisa kaba ai sngewbha mano mano namar kano kano ka daw. Ia ka peisa ioh - ei, ki 'riew tymmen kirn shah ban buh lang bad ka peisa kamai. Ia kane ka peisa dei ban buh la ka jong lane ban pynlut noh. Ki 'riew tymmen jong ngi ki sngewthuh ba ka long ka bym bit ban pyniakheh lang ia ka peisa kaba la kamai da ka umsyep bad ka peisa ioh ei. Ki sngewthuh ba kano kano ka peisa kaba la kamai hok da ka umsyep, haba ioh ban pyndonkam, ka ai jinghun bad ka tei ia ka met bad mynsiem, ka longbrieve manbrieve bad ka long- iing long sem.

(d) Ka peisa iakhalai: Ka peisa iakhalai ka long ka peisa kaba u brieve u knieh kynthet ia ka hok kiwei da ki buit bymman laiphew jait ha ka jingiakhalai. Ka jingiakhalai ka lah ban long ha kano kano ka rukom - kaba paw bad ka bym paw. Ki 'riew tymmen jong ngi ki niew ia ka peisa iakhalai ba ka long kaba tngit kaba u brieve u kamai da ki buit bymman. Ka peisa iakhalai ka pynsniew ia ka jingmut jingpyrkhat, ia ka mynsiem bad ia ka longrynnieng man ryinieng u brieve- Uba ioh iakhalai bad uba duh iakhalai ki long ha kajuha ka ryinieng. Ki 'riew tymmen ki

niewtang ba ka long ka bym dei ban pynrung ia ka peisa iakhalai ha iing hasem bad ka long ruh ka bym bit ban bsa ia la ki khun ki kti da ka peisa iakhalai. Borabor, ka peisa iakhalai ka wallam ka jingtim ia ka longbriew manbriew bad ka longiing longsem namar ka long ka peisa kaba shu knieh kynthet ia ka hok kiwei pat da ka jingiakob iathong, ka jingialeh ryngkat ka jingkheinduh bad da ka jingiamai iatim, Ka peisa kaba ioh- kamai da ka jingiakhalai kan leit phai biang sha ka jingiakhalai.

(e) Ka bam - sap ne bam tyngka: Ka bam sap ka long kawei pat ka rukom kamai u briew ban ioh peisa. Kane ka ktien bam sap ka long ka ktien kaba dang pyndonkam shen. Kham mynshuwa lane katto katne phew snem mynshuwa ki briew ki ju pyndonkam da ka ktien bam tyngka. Ka ktien bam tyngka ka long ka ktien kaba eh bad khor katta katta ha ki shkor jong ki nongsngap. Ha ki por mynshuwa ka ktien bam tyngka ka kham thew ia ki nongshohnoh briew lane ia kino kino ki briew kiba kamai peisa na ka bynta kano kano ka kam sniew. Kane ka ktah ia u nongai bad u nongpdiang ia ka peisa. Ka jingpynbam tyngka lane thong tyngka ka long ka kam kaba sniew tam kaba u briew u leh na ka bynta ban ioh ia kano kano ka jingthmu. Ka jingpynbam tyngka bad ka jingbam tyngka ka long ka kam khein duh kaba pyntriem shikatdei ha ka imlang sahlang Khasi. Kane ka ju wan jia tohkhat let ha ka imlang sahlang Khasi. Ha ka rukom Khasi haba ioh kem kum ia kine ki briew, la ju pyndait diengsong bad khi-lai- nuid ia ka khlieh jong ki ban ai nishan ba ki long ki nongkam sniew lane nongshohnoh briew.

Ha kane ka juk mynta, ba la shai ka pyrtthei, ka jingpynbam tyngka ka wan ha kawei pat ka dur- ha ka dur kaba kham i don akor phewse ha ka jinglong bad jingleh kaba sniew

kham sniew ban ia ki jingleh ha ki por uba rim bajah. Ha kito ki por ka jingbam tyngka ka long tang uwei lane arngut duh bad kata ka jingbam tyngka ka long tang shisien ha ka shi jingim u briew. Hynrei ha kane ka juk mynta ka jingbam tyngka ka long khlem kut trai, u briew u iai bam katba dang sah ka snep bad ka shyieng jong u. Kumba ong ki kpa tymmen jong ngi, 'Peisa - tyngka,' **tang ka kaba pynpisa** kaba iai dawa ban leh ban dup ioh peisa, kam pher lada pang ka mynsiem bad ringswai ka jingim. Ka jingbam tyngka kam ai jinghun- katba nang bam katta ka nang dawa.

Ha kine ki sngi, katba nang iaide ka por, ka ktien bam tyngka ka la nang duh bad la mih sa ka ktien bam sap. Hooid, ka ktien bamsap kam dei ka ktien thymmai hynrei ka long ka ktien kaba kham jem bad kham suk ia ka shkor jong ki nongsngap. Kumba paw mynta, kito kiba la nang phareng bad kiba mar mlien bha ia ka corruption bad kiba la ju bam shngiam ruh da ka, kim sngewdei ha lade ba ka dei ka 'Corruption'. Ban pynksan ia lade, kin ong ba ka dei ka 'Commision,' da kane kin nang pynjur ka jingbam tyngka, bad kata kan long ka hok ia ki. Kumba long ka ktien phareng 'Corruption', ka ktien 'Bamsap' ruh ka lah ban jah noh bad kito kiba ju bamsap kin sngewthuh ha lade ba ka dei ka 'Bai iarap', bad da kane kan pynpyut ia ka long rnyieng jong ki, ka longiing longsem bad ka imlang sahleng. Lada ka bamsap ka la suhthied ha ka ri bad ka jaitbynriew, ka ktien '**Kamai ia ka hok**' kaba long ka nongtymmen jong ka jaitbynriew Khasi kan sa noh putet.

(g) Ka dor jong ka jingbamsap: Ka jingbamsap ka long kawei na ki jingkamai kaba shu ioh ei kumba shu khat. Ka jingbamsap ka iapher na ka jingiakhelai. Ka jingiakhelai ka long ka jingkamai kaba shu duh lynter, lah ruh ban ioh shisien arsie

bad kata ka long tang ki briew kiba donbok; bad ka jingbamsap ka long ka jingkamai kaba shu ioh lynter bad kata ka long da kaba kijit ia ka umsyep bad ka hok kiwei pat. Ki briew kiba bamsap ki bam ar maloj- ka maloi kaba rit bad ka maloi kaba heh. Ka maloi kaba rit ka long kata ka jingkamai da ka umsyep- ka jingkamai ia ka hok- kaba hap ban trei shitom ban pyndonkam lut ia la ka bor, ka buit bad ka jingiaishah khnang ban ioh ia la ka bhah kaba la mang katkum ka jingtrei bad ka jingim u briew shimet shimet. Ka maloi kaba heh ka long kata ka jingkamai kaba shu ioh khat ei buk buk kaba ym donkam ban da trei shitom lane ban pynlut por hynrei kaba lah ban ioh da ka buit sianti bad da ki jingpyndonkam bym hok ia la ka jingtrei kaba la buh ia u ban trei khnang ba un im. Ka maloi kaba rit ka long kata ka jingkamai kaba ioh da kaba shu mang da ki nongaikam, Ka long ka jingkamai kaba ioh ka jingkyrkhu na ki briew bad na ki nongaikam. Ka maloi kaba heh ka long kata ka jingkamai kaba shu ioh ei da ka jingtrei bym hok ia la ka kam kaba la buh ban trei bad kaba shu knieh kynthet ia ka peisa na ki briew kiba iadei kam khamtam na kiba duk ba suk, bad kaba shu bam ei ia ka peisa u paidbah lane ia ka peisa kaba la mang na ka bynta ka jing pyntrei kam. Ka maloi kaba heh ka long ka jingkamai bym hok kaba ioh lum da ka jingkhniun bad jingtim ki para briew.

(ng) Ka jingmih na ka jingbamsap: Kumba la ong haneng ka jingbamsap ka long ka jingkamai bym hok. La buh ia u briew ban trei ia ka kam kaba beit bad kaba hok. Haba u briew u pyndonkam bakla ia kata ka kam kaba u trei u pyntngit ia ka. U briew uba bam sap u pyntngit ia ka kam ha ki lai bynta. Kaba nyngkong, u pynhiar dor bad pynjah burom ia ka jinglong ka kam. Kaba ar, u shim ka tulop lane ka jingsiew

kaba biang ia ka kam kaba u trei- kam pher la u'trei ia ka kam kaba rit ne kaba khraw. Kaba lai, na ka juh ka kam bad ka bynta kaba u trei u thaw ka jingkamai bym hok bun shah ban ia ka tulop ne ka jingsiew kaba u dei hok ban ioh. la kane ka jingkamai u khlong na ki brierw kiba iadei kam bad u, la ki long kiba riewspah ne kiba duk basuk, lane u khlong na ka tyngka kaba la mang ban pyntrei kano kano ka kam na ka bynta ka jingbha bad jingpynroi ia ka ri bad jatbynriew. la kane ka jingbamsap la ong ba ka long ka jingkamai bym hok bad kaba la ioh da ka jingtim na ki para brierw, la ka long ha kaba paw ne kaba rieh. Ki brierw kiba ia don bynta ha kane ka jingkamai bym hok ki ai da ka bym banse ryngkat bad ka jingkhniem bad jingtim. Don ruh ki brierw kiba jakhliä kiba pynshlur ia ka jingbamsap.

Ha ka rukom pyrkhat khasi, ka ktien tim ka long kaba sniew, kaba wallam ia ki jingpang, jingeh bad jingjynjar. Haba ki kmie ki kpa ki tim ia la ki khun, kin nym ioh jingkyrkhu, kaba mih ka long tang ki jingeh bad jingjynjar. Ki kmie ki kpa kim ju tim madei ia la ki khun lait noh tang haba ki la leh ka kam kaba pynsngewsih kthang ia ki. Haba ki brierw ki tim ia ki para brierw ryngkat bad ka daw kaba biang, kito kiba shah tim kin ym ioh jingkyrkhu. Da kumwei pat, kata ka jingtim ka ktah ia u shimet bad ia ka iing hi baroh kawei. Kito lei lei kiba tim bad jingpynbarn da ka nia ka jutang khamtam ha ka jingiadei bad ka kam peisa-tyngka ka kjit ia uta uba shah tim da ki jingjia lalphew- jait- lada kaba paw ne ka bym paw ruh - ka lah ban jia noh lane jia ha kano kano ka por. Uba shah tim u lah ban ym sngew ei ei hynrei un nym ioh jingsuk. U j kumba um lei lei hynrei u long u ba kordit ka jingim. '

U Khasi u pyrkhat ba ka peisa bamsap ka long ka bym

dei ban bsa khun lane ban pyndonkam na ka byna ka iing sem, namar long ka peisa kaba shu ioh-ei ryngkat bad ka jingtim, ka peisa jong ki para briew ne ka peisa jong u paitbah. Dei tang ka peisa kaba pynmih na ka umsyep kaba long ka nongkynti bad ka hok kaba lah ban tei ia ka longiing longsem, ka longbriew manbriew bad ka longrynnieng. U Khasi u sngewthuh ba ka ktien hok bad ka kam hok ka kham kor ban ia ka peisa namar ka tei ia ka longbriew manbriew bad ka longiing longsem. Ka peisa ka lah ban rung bad ka lah ban mih hynrei ka hok, ka sot bad ka jingshisha ka iaineh skhem bad ka nang tyngshain.

U Khasi u sngewthuh ba ki khun ki long ka jingkyrkhu. Uwei pa uwei u khun uba la kha sha ka pyrthei u wanrah hi la ka jong ka bam. Namarkata, ban im donkam ban kamai tang ia ka hok, ym donkam ban thok, ban shukor ne ban shim ei bad bam ei ia ka peisa jong kiwei. Haba u khun u pan peisa, u da kylli pyrthew ia ki jingdonkam bad shuwa ban ai, u da khan bad da thew katno dei ban al, ioh tam ne duna ia ki jingdonkam. Um ju kham ai madei ia ka peisa namar u sheptieng ioh ka lam sha ka jingjot; sa kawei pat, ka peisa kamai hok ka long kaba dei ban da leh sumar, ban tyngkai bad kunai katba lah. Ki khun, ha kajuha ka rukom, kim ju pan madei haba ym donkam. Haba u kpa u ioh ban ai ki pdiang da kaba kmen.

Ha kawei pat ka liang, ki briew kiba bamsap kim da salia eh ia ka peisa. Ka tulop ne ka jingioh kaba shisien shibnai ka long noh ha ki tang ka bai rneng. Ka peisa kaba shu ioh ei ka tuid buk buk kum ka umsaw bad ki ioh ban jngi katba ki mon. Haba u khun u pan shi tyngka kin ai shiphew lane tam ia kata, ym donkam ban kylli ia ki jingdonkam lane kim kwah ban tip un leh aiu ia kata ka peisa. Ki Khun ha kajuha ka rukom, kin pynlut ia ka peisa katba ioh namar ki tip ba ka long ka peisa

iohei, da kata ka peisa ki leh kmen, leh sngewbha ym tang ia lade ryngkat ba ki lok ki jor. Ki khun haba ki ioh peisa buk buk kim kynmaw shuh ia lade, bad ia ka lawei ka jingim, kim kwah shuh ban trei shitom ne pynshitom ia lade; ki iohi ba kane ka peisa kaba shu ioh ei buk buk ka ai ha ki ka jingkmn bad ka jingsuk mynsiem. Katba u kpa u nang ai peisa katta ka nang dawa ka jingpynlut ki khun. Ha kane ka rukom, bun ki kmie ki kpa kiba pynjot hi ia la ki khun namar **ki bsa ia ki da ka tyngka ym da ki jinghikai**. Don katto katne ki briew kiba brai ia ki kam pyrthei bad kiba la kyrni bha ha ka kam bamsap ki klet noh wat ia la ka tnga, ki khun bad ka iing hi baroh kawei. Ka jingieit jong ki ia la ka iing ka la duh noh bad ki sdien ia lade ha ka tyngka, bad da ka, don kiba pynsngewbha ia lade ha ka bam ka dih, don kiba pynsngewbha ha ki kam iakhalai bad don ruh kiba pynsngewbha ha ki kam awria. Don ruh ki briew kiba kyrni ka bamsap hynrei kiba shakri bha ia la ka jong ka iing, ka niam bad u Blei.

Katba ka ri bad ka jaitbynriew ka dang shah teh mraw ha ka jingsynshar nongwei, ki briew ki dang don ka jinglong khuid, jingtip briew tipblei, ka jingiatiplem, ka jingsheptieng ia U Blei,- kham niar ban shem ia ki kam thala, kam awria bad ka jingbamsap. Mynta naduh ba ki briew ki la ioh ban synshar hi ia la ka ri, ngi iohi ia ka jingjyllei bad jingroi sted ki jingsniew laiphew jait. Ka jingdih kiad shynrang bad kynthai, ki jingiakhalai laiphew jait, ki kam awria, bad ka jingbamsap naduh uba rit haduh uba khraw. Kane ka jia long namar ka jingjyllei ka jingbamsap kaba pynpyut ia ka ri bad ka jaidbynriew. Ka ri i kumba la nang riwspah bad nangkiew ha kiei kiei hynrei ka la nang hiar arsut ha ka longbriew manbriew bad ka longiing longsem. Ngi iohi ba katba nang khraw ka jingbamsap katta ka wallam ka jingduk bad ka jingkyrdueh ia u paidbah. Ka

jingbamsap ka ktah jur ia ka hok jong ki nongbylla sngi, ki nongrep, ki nonghikai bad kiwei kiwei kiba trei la ka jong ka kam. Ka ri Khasi bad Jaintia ka long, da shisha, ka ri kaba riewspah hynrei ngi i duh jingkyrmen kum ka jaitbynriew namar mynta la mih bun ki **Ingkhong Shyllangmat** kiba knieh noh ia ka dor bad ka hok jong kiba duk ba suk ban pynriewspah ia lade shimet.

9. KA TREI KA KTAH

Kumba la kdew shakhmat, u Khasi u long u nongrep bad tang kumba arphew na ka shispah kiba trei ia kiwei ki kam kynthup ia ki nongtrei sorkar. Ha kane ka juk mynta, ba la shai ka pyrthei, la mih bun ki kam kiba pher bapher bad bun ki nongrep Khasi, nador ka kam rep, ki la pyrshang ruh ban ia tare ia kiwei kiwei de ki kam, kum ka kam khaii, kam nonghikai, kam misteri, kam karkhana, kam niah kali, kam suh kam thain, kam ri jingri, kam bylla sngi bad kiwei kiwei ki kam. Ka jingroi sted ka jingnang jingstad bad ka jingbym seisoh shuh ka rep ka riang ki long ki daw bah ia kiba bun ki nongrep ban iehnoh ia ka rep bad ban wad pat da kiwei kiwei ki lad.

1. Ka kam rep:

Kumba paw mynta, ki khun samla, shynrang bad kynthei, kim mon shuh ban trei ia ka kam rep. Kiba dang sah ha ka kam rep ki long kito ki bym nang thoh nang pule, ki rangbah kiba la met iaw bad ki kynthei. Kan poi ka por ban nym don jingrep, shuh ha ka ri jong ngi namar kiba bun ki ia beh ia ka

jingnang jingstad. Kumba long mynta ka rep kba, riewhadem, phan, phankaro bad kiwei kiwei ki jingrep bakordor ki la nangduh nang duh bad ki nongrep ki pynjur sa tang ka rep jhur bad kiwei ki jingrep kiba ioh peisa mardor. Ka daw jong kane ka long ba ki biew kim mon shuh ban rep, nalorkata, ka jinglut ka kham bun ia ka jingmih.

ki jaka pdeng jong ka ri Khasi bad Jaintia, ki nongrep ki shem jingeh shibun ban rep kba bad u phan. Ka jinglut ka bai nongtrei bad ka bai sboh ka long kaba palat katba ka jingmih ka duna haduh katta katta. U khaw 'khar na iew lah ban ioh haka dor shiphew lane khadwei tyngka shi kilo katba u khaw uba rep hi u shongdor haduh kumba khat hynriew lane khat hynniew tyngka shi kilo. Kumjuh u phan, ka bai nongtrei bad ka bai sboh kan shongdor kumba hynriew tyngka shi kilo, hynrei lada die ia u phan uba thung hi un shongdor tang kumba lai tyngka shi kilo. Ha ki thain Jaintia bad Bhoi, u kba u kham seisoh hynrei la katta ruh haba ianujor ia ka jinglut bad ka jingmih dang bun hi ka jinglut. Ha kane ka rukom, bun ki nongrep khasi ki kylla duk namar ka rep ka bam duh ia ka bai seng. ~~Kiwei pat ki jait jingrep~~, kum u krai, ka riewhadem, ka shriew, u phankaro bad u phandieng, ki nongrep kim smat shuh ban rep namar ym don ba thied bad ym don shuh ba bang ban bam. Kumne ka iaid ka pyrthei ha ka juk mynta. Lada jia ba pynsahnggeh ia u khaw dkhar, ka jaitbynriew jong ngi kan iap thngan shisyndon. Mynta ka la dei eh ka por ban pynshlur ia ki nongrep ban pynjur ka rep kba, riewhadem, phan bad kiwei kiwei ha ka rukom pyrkhat kaba thymmai(new system) ka ban myntoi ia ki nongrep, ia ka ri bad ka jaitbynriew hi baroh kawei.

Kumba la ong haneng, bun ki khun samla jong ngi kim bang shuh ia ka kam rep namar kim don bor ban kit khoh, ban

bah mohkhiew bad ban iaid da ka kjat kumba long ki longshuwa. Kito lei lei kiba la nang la stad ki shem ka jingeh kaba khraw ha kine ki sngi: ban rep kim don bor bad kim don hi ruh ka bai seng, ban wad da kiwei ki kam ruh kim ioh. Kaba mih nangta ka long sa tang ban shu shangmakia bad trei da kiwei pat ki kam jakhlia ki bym iadei dur bad ka jingim longbriew manbriew. Ngi ong borabor ba ka imlang sahlang ka la pyut, ka daw ka long ba ngim lah ban ai kam ia ki. Lada ka Sorkar ka iohi ia kane ka la dei ban pynmih ki lad trei kam bapher bapher ban pynim ia ki.

II. Ka Kam Khaii:

Ka kam khaii ka long kawei na ki jait kam kaba ki briew ki trei, tangba ia kane ka kam la ju trei borabor da ki briew kiba don ka sap kaba kyrpang, namar ka dawa ia ka bor sngewthuh, ka bor kren, ka bor pyrkhat bad ka jinglah ban pyniadei para briew.

Ha ka spah snem kaba khathymriew, ki Syiem Jaintia bad ki Syiem Khairim ki iateh lok bad ki Syiem Ahom bad Kachari bad da kata ki pynlong ka jingiakhaii pateng hapteng jong ki. Kane ka jingiakhaii hapteng ki Khasi, Ahom bad Kachari ka la neh da ki snem bad ki snem. Hadien, namar ki katto katne ki daw khamtam ka jingiaknieh pud knieh sam, ka la duh noh ka jingiakhaii pateng hapteng jong ki. Ka kam khaii kam long kaba thymmai, hapteng ki Khasi tangba kim da lah ban pynpaw ia lade kumba long kiwei pat ki jaitbynriew ba la shai.

Ha kine ki phew snem kiba la leit wat haduh mynta, ki longkmie ki shim ka bynta kaba kham kongsan ha ka kam khaii pateng. Ka jingkhaii pateng ki longkmie ka long borabor hapteng ka jaitbynriew Khasi bad katto katne ki briew na ki Jylla kiba iajan. Kim da lah ban pynpaw ia lade ne iashim bynta

bad kiwei pat ki jaitbynriew ha ki jylla ka ri India. Ha kine ki khyndiat snem, la don katto katne ki rangbah kiba ieng rangbah ban ia khaii bad kiwei pat ki jylla ka ri India bad wat shaduh bar ri India.

Ha nongbah Shillong baroh kawei don tang katto katne ki Khasi kiba ioh bat ia ki dukan kiba heh. Ki nongkhaii kiba heh spah ki dei ki nongwei. Ka spah kaba bun kaba mih na ri Khasi bad Jaintia ka leit lut sha ki nongwei, lehse, tang kumba laiphew na ka shispah la ioh ban pyndonkam ha la ka jong ka ri bad kumba hynniew phew na ka shispah la ioh ki nongwei. Ki nongwei kim lah ban pyndonkam ia kane ka spah ha ri Khasi bad Jaintia, hynrei ki lum bad ki kit ia ka spah kaba ki kamai nangne ban pynroi ia la ka jong ka iing, ka shnong bad ka ri. Ki long kum u ngap uba wan na kylleng ka ri India ban kjit ia ki syntiew ba iewbih ka ri Khasi bad Jaintia bad ban leit tep ha la ka jong ka ksing ngap.

Haba ngi phai sha ka lewduh, ngi i kumba ki don shibun ki nongkhaii Khasi. Ka jingshisha ka long ba kiba bun kiba die jingdie ha lewduh ki dei ki longkmie kiba shu shong iew-madan bad kiba im bad kamai tang ban kyndoi jakpoh ia la ka jong ka iing. Ki die mynsngi bad ki pynlut noh mynmiet. Kiba kamai shisha ki dei ki nongwei kiba shongdukan ha lewduh bad ha baroh shi lynti ka surok lewmawlong bad surok Guwahati bad kiba die ia ki mar kiba heh bad rem dor.

Kawei ka jingiapher ka long ba ki nongwei ki lah ban nang pynheh bad pynkhr̄aw ia ka jingkamai katba nang mih ki snem hynrei ki nongkhaii Khasi, khamtam ki nongdie iew madan, ki pynlut noh ia ka bai seng bad lah ruh ban don kiba dap ram. Ka daw ba kongsan ka long ba ki nongkhaii Khasi kim nang ban kunai. Ki nongkhaii Khasi lada ki iohnong shispah, kin

pynlut shispah arphew-kumta arphew tyngka la nang khatē na ka baiseng. Ki nongwei pat naduh uba rit tam kum u khar die shana ha surok, lada u iohnong shispah ne shispah sanphew shisngi, un bam tang arphew tyngka bad ia kaba tam un pyllang khop ban rah sha la shnong.

Ka jaitbynriew khasi ka long kawei na ki jaitbynriew riwlum kaba im khlem jingkhein. Ki briew kim mon ban khein katno ki ioh bad katno ki lut. Ban ioh ban leh sngewbha, ban thaw burom bad ban pyni rong ia lade, kin pynlut noh ia ki jingdon baroh khlem da khuslai ia ka lawei jong ka jingim. Borabor ka jingim lut phut kam lah ban kyntiew ia ka ioh ka kot bad ka longbriew manbriew.

III. Ka Jingtrei Shimet Shimet:

Kumba long ha kiwei kiwei ki jait kam, ha ka kam khaii ruh u Khasi u trei shimet shimet. Kham niar ban don napdeng ki khasi kiba don ka synjuk trei lang (co-operative society). Lada ka don ruh tang katto katne por ka la pra noh. Mynta ki lah ban seng kum kane ka Synjuk trei lang, tang na ka bynta ban ioh peisa na ki Bank bad ka Sorkar, bad lashai kin pynpra noh. Kim don ka mynsiem iatrei lang, kim don ka jingiashaniah uwei ia uwei pat, kim don ka mynsiem ban pynroi ia ka kam. Kiba kham bun ki long ki khwan myntoi shimet shimet. Haba phai sha ka ri bad ka jaitbynriew, kumba long mynta, i kumba ka la nang kiew ha ka ioh ka kot bad ka longbriew manbriew. Ka jingshisha ka long ba ia ka spah jong ka ri kaba don ha sla bad hapoh khyndew, ka bym ju pyndonkam mynno mynno, mynta la sdang ban khlong bad pyndonkam ha ka khaii ka pateng. Da kane ka rukom, kiba nang khaii ki la nang riwspah katba ki briew kiba duk bad ki nongrep ki la nang duk. Borabor heba jur ka jingia khaii ka jingmyntoi bad ka jingim

ka long tang ia kiba riewspah hynrei haba jur ka rep ka ri bad ka jaitbynriew ka im bad ka suk ka sain. Ha kane ka juk mynta ngi iohi ia ka jingkhlein u dewiong, ka jingphuh u mawshun bad ka jingih-rong ki diengsawdong, bad ngim iohi pat ia ka jingdkhaw ki lum bad ka jingjot ka khyndew ka shyiap bad ruh ka jingtyrkhong ki um ki wah. Katto katne ki nongkhaili ki da kmen eh ban ioh lum spah ia lade shimet shimet da ka spah jong ka ri bad ka jaitbynriew. Haba ngi kren ia ka ioh ka kot jong ka jaitbynriew, ka jingkylli ka lah ban mih, katno ngut napdeng ki Khasi kiba ioh myntoi na kane ka spah kaba ngi khlong na ka ri. Ngisheptieng ba ka spah jong ka ri kaba kham bun ka tuid sha kiwei pat ki jaitbynriew bad ki nongwei.

Namar ba ka jingtrei ka long shimet shimet khamtam ha ka kam khaili kumta ka spah Khasi kam lah ban shan slem. Katba uta u briew lane kata ka briew kaba khaili ki dang im, ka spah ka kyrsoi kum ka umpohliew bad mar iakhyllait ka khmat jong ki, ka spah ruh ka rngad noh artad. Kham niar ban don ki khun ne ka pateng bynriew khasi kaba bud kaba lah ban pynroi ia ka spah ki kmie ki kpa. Bunsien ka spah kaba lum ki kmie ki kpa, lada kim pynbynta ha ka por ba ki dang im, ka kylla long pynban ka madan thma hapdeng ki khun. Nalor kata kham niar ruh ban don napdeng ki Khasi kiba riewspah kiba pynsah kyrteng ne pynsah nam ia lade da kino kino ki jingtei. Ka spah kaba ki lum ka lut noh tang ha ka jingim shimet-ia lade kim lah ban pyndonkam, ka ri bad ka jaitbynriew ruh kam ioh jingmyntoi.

IV. Ka Jingkhaili Mar Shabar Ri:

Ngila iai pynpaw borabor ba ka ri lum Khasi Jaintia ka long ka ri kaba riewspah. Ngidon ki mar kiba kordor hapoh bad ha sla khyndew, ngidon ruh ki jait jingrep kiba pher bapher kiba

lah ban ia khaii shabar ri, kum u phan,ka riewhadem,u synsar,ka latyrpad,u sohmrit khlaw,ki soh laiphew jait khamtam u sohniamtra,ki jhur bad kiwei ki jait jingrep

Haba ngi kren ia ki mar hapoh khyndew khamtam u dewiong bad u mawshun, ka jingphah shalan shabar ri ka long kaba jur.La ngim ioh ka jingkhein kaba biang,la antad ba ka jingmih kan long da ki spah klur shisnem shisnem.La khein antad ba ka jinglut kan long kumne:ka bai nongtrei kan long kumba laiphew na ka shispah- kiba bun ki nongtrei ki dei ki nongwei bad ki mynder ri;ka bai kit kan long kumba laiphew na ka shispah—kiba kham bun ki nongniah kali, ki dei ki nongwei bad ki truck ruh ka jong ki nongwei;kumba arphew na ka shispah, ka leit sha ki nongkhaii-kiba kham bun ki nongkhaii ruh ki dei ki nongwei; lehse tang kumba ar phew na ka shispah ka sah ha ki trai ri bad trai khyndew.Ka jingmyntoi ia ki trai ri ka long tang khyndiat katba ka jingpynjot ia ki lum ki wah,ki shnong ki thaw,ki iing ki sem bad ka longbriew manbriew ka long kaba shyrkhei.Tip katno snem ki briew ki lah ban shong bad im ha kito ki shnong kiba la pynjolor bad pynjot da ka jingtih ia ki mar hapoh khyndew. Kiba riewspah ki lah ban phet bad riehtngen ha ki nongbah hynrei kiba duk ki lah ban kylla nongphetwir(refujee) ha la ka jong ka ri.Nalor kata,ka jingjyllei ki nongwei bad ki mynder ri ka ap ka jingma kaba khraw ia ka ri bad ka jaitbynriew.

Kiwei pat kj jait jingkhaii kiba ju shalan shabar ka ri Khasi bad Jaintia ki long u jhur,ki soh bad kiwei kiwei ki jait jingrep.Namar ba u phan um da seisoh bha kum ha ki por mynshuwa kumta ki nongrep ki la pyrshang ban pynjur da ka rep jhur,kum u kubi,u phur,u muli,u ri bad kiwei kiwei.Namar kine ki jait jingkhaii ki long ki mar pyut,kumta la shalan ia ki

tang sha ki jaka kiba iajan bad ka Meghalaya.

Ha ki jaka pdeng jong ka ri Khasi,u jhur u la long ka jingkyrshan kaba khraw ia ki nongrep khamtam haba iaid bha ka jingshalan.Ha kiwei pat ki jaka jong ka ri Khasi bad Jaintia ki jingrep kiba ju shalan shabar ri ki long,u tympew,u kwai,u synsar,u sohniamtra bad kiwei kiwei.

Haba phai sha kane ka liang,ki kynthei Khasi ki shim ka bynta kaba khraw ban ia khaii bad ki nongwei.Ki kynthei Khasi ki thied na ki nongrep na ki iew ki hat ha ki jaka bapher bapher ryngkat bad ka jingiatrei lang bad ki nongwei.Lada ioh ki nongwei kiba shaniah ka jingshalan mar ka iaid,lymda kumta, ki pyniaid ia ka jingkhaii tang ha la ka jong ka ri.Kawei ka jingeh ka long ba ki nongwei ki bat ha lade ia ka iew ban pynhiar dor ne pynkiew dor ia ki mar.Lada ki lah ban pyniaid ia ka jingshalan,ka dor ka kiew bad lada kim lah,ka dor ka hiar.

Borabor ki nongrep ki ud ba ka jingmih na ka rep ka long kaba tad dor haduh katta katta. Bun ki nongrep ki ieh ia ka rep namar kim lah ban pynmih wat tang ia ka bai trei ne bai lut. Haba die ia u phan,lada na ka kti u nongrep ka long lai tyngka shi kilo,ha ka kti ki nongdie lang kan long saw tyngka bad ha ka kti ki nongdie khutia kan long hynriew tyngka shi kilo. U tympew,na ka kti ki nongrep ka long san tyngka shi tap,ha ka kti ki nongdie lang.shiphew tyngka bad ha ka kti ki nongdie khutia khatsan tyngka bad kumta ter ter.Na ka kti ki nongrep ka mar ka long kaba tad hynrei ha ka kti ki nongkhaii ka long kaba rem. Katba nangmih ki snem, ki nongrep ki nang duk bad ki nongkhaii,ki nang riewspah.Lymda ka sorkar ka shimti ban thied ia ki mar rep lane kano kano ka synjuk lang kan pyniaid ia ka kam khaii,ki nongrep shimet shimet kim lah ban kyrshan.

Ha ki phew snem kiba la leit, ki briew ki im tang shisur ka jingim kaba synlar bad ki hun katkum ka jingkyrkhu U Blei na ka rep. Dang khyndiat snem naduh ba la mih ka jingtih ia ki mar hapoh khyndew bad ka jingkhail ia ki mar khlaw khamtam ka jingioh ban synshar hi ia la ka jong ka jylla(state)ki briew ki la long kumba lamwir, kim mon shuh ban rep. Naduh kiba duk lane ki nongbylla sngi haduh ki briew kiba riwspah ki la kham sngewtynnad ban trei ia ki kam kiba ioh peisa noh ir ir kum ka kam trei dewiong, trei khlaw, kam niah kali, kam kontraktor, kam khail bad kam sorkar. Kumba ong mano re, ka ioh ka kot ka la kiew shi katdei ha ka ri jong ngi haba ianujor bad ki phew snem kiba la leit. Ryngkat bad ka jingkieu ka spah ka kiew ruh ka jingsniew bad jingthala laiphew jait naduh ka rukom trei kam trei jam haduh ka longbriew manbriew.



Ki Kot da U Rev. I. Kharkongngor

1. Ki Biria U Peh-Sylli Part I
2. Ki Biria U Peh-Sylli Part II
3. Ki Biria U Peh-Sylli Part I, II, III
4. Ka Dienshonhi (Khasi Dictionary)
5. Khasi Glossary
6. Ki Nuxsa ha ka Jingim ba dei ban phikir
7. Ki Nonghikai jong ka Skul Pynpaw
8. La Pyndep
9. Ki Briew ha ka Bible
10. Ka Matti U Blei
11. Ka History ka Balang Laban
12. Ki Jingkynshew ha ka Bible
13. The Tribal People
14. The Preparation for the Gospel in
Traditional Khasi belief.
15. Ka Jingim Tip-briew Tip-blei

La shon ha Shandora Press, Office: 32/33 Synod Complex
(1st. Floor), Mission Compund, Shillong- 2.

☎ 242237 Res. 229110